

摘藻堂四庫全書薈要

史部

欽定四庫全書薈要卷八千九百七十五

史部

通志卷七十六

宋 石 迪 功 郎 鄭 樵 漁 仲 撰

昆蟲草木略第二

木類 果類 蟲魚類 禽類 獸類

木類

伏苓曰茯苓其抱根者曰茯神典術云松脂入地千年為茯苓今詳茯苓乃松脂所化而云千年未必耳龜策

傳云茯苓在菟絲之下今詳茯苓生山林而菟絲生人間叢薄自清濁異趣非同類相感者

琥珀漢書云出罽賓國舊云松脂入地千年化成又云茯苓千年為琥珀又云松脂內溢入地而為茯苓外溢入地而為琥珀今之所得其中則有蚊蟲蜂螳之類如生此皆是未入地所著者又云楓脂千年為琥珀大體中土不生來從外國皆云初得之如桃膠便可啖須臾則堅凝今人有煮蝦雞及青魚枕偽為之者

璧曰璧珀舊云琥珀千年為璧然不生中國不可知也
栢爾雅曰栢栢生於乾陵者其木之文理多作菩薩手
雲氣人物鳥獸之形

桂本草有桂茵桂牡桂三條云茵桂無骨正圓如竹牡
桂一名侵一名木桂古云丹桂者謂其皮赤耳其花實
似吳茱萸藥中之靈物而薑桂之滋為食味所重呂氏
春秋云桂枝之下無雜木雷公云桂枝為丁入木中其
木即死江南李後主患清暑閣前草生徐鍇令以桂屑

布階縫中宿草盡枯爾雅云檟木桂

杜仲曰思仙曰思仲曰木綿其葉似辛夷嫩時可食江南人謂之綿芽

荊又有蔓荊牡荊之別荊可以作簞者今人謂之黃荊蔓荊亦曰小荊其實入藥用牡荊亦用實登真隱訣注云北方無識者又云梁天監三年將合神仙飯奉敕論牡荊曰荊花白多子子麓大歷歷疎生不過三兩莖多不能圓或扁或異或多似竹節葉與餘荊不殊蜂多採

牡荊牡荊汁冷而甘餘荊被燒則煙火氣苦牡荊體慢
汁實煙火不入其中主治心風第一于時遠近尋覓不
得猶用荊葉則牡荊殆絕矣

寄生生于木上有兩種一種大者葉如石榴一種小者
葉如麻黃其實皆相似云是烏糞感木而生入藥以桑
上者良一名宛童一名寄屑一名寓木爾雅云寓木宛
童詩云蔦與女蘿施于松上大者曰蔦小者曰女蘿生
松上者曰松蘿

五加曰豺漆曰豺節葉作五叉蘄州呼為木骨入藥用
根皮道家呼為金鹽母與地榆皆可煮石故曰何以得
長久何不食石蓄金鹽母何以得長壽何不食石用玉
豉玉豉者即地榆也又曰寧得一把五加不用金玉滿
車寧得一斤地榆安用明月寶珠

薰陸香即乳香南方草木狀云薰陸出大秦國其木生
於海邊沙上盛夏木膠流出沙中夷人取之賣與賈客
沈括云乳香即薰陸如乳頭者為乳香塌地者為塌香

雞舌香即丁香陳藏器以雞舌香為丁香母今按沈括
考究諸義直是丁香無疑齊民要術云雞舌香世以其
似丁子故一名丁子香應劭為漢侍中年老口臭帝賜
雞舌香含之後來三省故事郎官日含雞舌香欲其奏
事對答芬芳日華子曰丁香治口氣正以此也

辛夷曰辛矧曰侯桃曰房木北人曰木筆南人曰迎香
人家園庭亦多種植離騷云辛夷車兮結桂旗

木蘭曰林蘭曰杜蘭皮似桂而香世言魯班刻木蘭舟

在七里洲中至今尚存凡詩詠所言木蘭舟即此也

榆曰零榆曰白松曰白榆其類有十數種榆即大榆也
生莢如錢古人採其初生者作糜羹食之令人多睡故
稽康謂榆令人瞑也今不復食者惟用作醬取陳者良
其皮至粘滑可膠瓦石北人用膠磴甯儉歲農人食之
以當糧有一種刺榆有鍼刺如枳其葉如榆淪而爲蔬
則滑美勝於白榆爾雅云樞莖唐風云山有樞即刺榆
也

槐有二種爾雅云櫟槐大葉而黑謂大葉而黑者櫟也
又云守宮槐葉晝聶宵炕謂晝聶合而夜炕布者守宮
槐也又云槐小葉曰榎大而散楸小而散榎然楸梓類
也櫟桐類也不可謂之槐

楮亦謂之穀其實入藥其皮造紙濟世之用也桑穀共
生者即此也

枸杞曰杞根曰地骨曰枸忌曰地輔曰羊乳曰却暑曰
仙人杖曰西王母曰枸櫞曰苦杞曰托盧曰天精曰却

老曰地仙苗爾雅云杞枸櫞世言有兩種無刺者曰枸
杞有刺者曰枸棘又云蓬萊南丘村者高一二丈其根
盤結甚固其村之人多壽考南地生者名枸棘有刺延
蔓如草萊沈括云陝西極邊生者高丈餘大可作柱葉
長數寸無刺根皮似厚朴甘美異他處大體出河西諸
郡其次江淮間埂上者實如櫻桃暴乾爲餅膏潤有味
降真香曰紫藤香主天行時氣家舍怪異和諸香燒煙
直上天召鶴盤旋於其上

厚朴曰厚皮曰赤朴曰烈朴曰重皮其植曰榛其子曰
逐折

猪苓曰猥屎曰豕橐曰地烏桃

竹之類不一爾雅云桃枝四寸有節今桃枝竹也唐人
有桃竹杖詩以其宜爲杖也又云鄰堅中此竹類而中
實者今人謂之木竹也又云籊簞中此竹類而中虛薄
者又云仲無筯今之簣簞竹也又云箛箭筍此箭筍凡
筍類惟箭筍爲美故會稽竹箭有聞焉又云篠箭今箭

竹小而希節者然竹之良者惟有篁竹謝靈運所游之澗今在鴈蕩其自死筍則謂之仙人杖

枳生江北橘生江南考工記曰橘逾淮而北爲枳言橘過淮則亦化爲枳矣故江北有枳無橘江南枳橘皆有穀曰吳茱萸或謂之檄續齊諧記云汝南桓景隨費長房學長房謂曰九月九日汝家有災可急令家人縫絳囊盛茱萸以繫臂上登高飲菊花酒此禍可消景如其言舉家登高山夕還見雞犬牛羊一時暴死長房聞之

曰此代之矣世人此日登高飲酒帶茱萸囊由此爾又
風土記曰九日折其房挿頭辟惡氣今人多臨井植之
云飲其水則無瘟疫

山茱萸其實似萇楚之實一名蜀棗一名雞足一名魁
實

秦皮曰石櫨曰盆桂其用在皮故曰秦皮亦曰岑皮其
木似檀俗呼爲白栲木取其皮漬水染筆而書之作青
色故墨家用之

梔子曰木丹曰越桃其花六出西域謂之簷蔔花

合歡曰合昏曰青裳曰夜合其木似梧桐枝弱葉繁互相交結每一風來輒似相解了不相牽綴植之庭階使人不忿其葉至暮而合故曰合昏今人皆謂之夜合花
嵇康云合歡蠲忿萱草忘憂

秦椒曰檓田野人呼爲樛子爾雅云檓大椒

衛矛曰鬼箭莖有三羽狀如箭翎俗謂之狗骨

紫葳曰陵苕曰茱萸曰女葳曰陵時曰陵霄藤生依緣

大木今人謂之凌霄花有黃白二種爾雅云茗陵茗黃
華葉白華莢白華者少故詩云茗之華云其黃矣
蕪荑曰無姑曰蕪蕪曰姑榆爾雅云莖荑蕪蕪榆類也
實似榆莢臭如玃可作醬

櫨子曰食茱萸曰越博雅云櫨越與吳茱萸俱有蕪名
內則云三牲用蕪是櫨子也爾雅云椒椒醜茱

茶曰櫨曰設曰苻其芽曰茗爾雅曰櫨苦茶本草云茗
苦茶其品最有優劣薛能詩云鹽損添宜戒薑宜著更

誇茶而入薑鹽則下品也想薛能未知滿甌香雪之興故云

五木耳曰櫛蘇恭云楮槐榆柳桑之耳也其桑耳曰桑茵曰木麥曰桑巨曰桑黃

棘與棗皆有刺故棘文列刺棗文複刺切韻云棘小棗也不生江南其刺曰棘鍼曰棘刺其實曰荇蔞曰馬胸曰刺原爾雅云終牛棘注云馬棘也刺麓而長

菴摩勒即餘甘也梵名之異耳

盧會曰訥會曰奴會俗呼爲象膽木中脂也

石南曰鬼目

巴豆曰巴椒

椒曰蔎藪曰陸撥曰南椒生於漢中者曰漢椒蜀中者曰蜀椒巴中曰巴椒

莽草曰春草曰芒草曰蒺爾雅云莽數節以其似竹而中實促節離騷云朝搴阰之木蘭兮夕覽洲之宿莽

郁李曰爵李曰車下李曰棣爾雅云常棣棠棣詩云常

棟之花鄂不韡韡

鼠李曰牛李曰鼠梓曰桤曰山李曰桤曰苦楸即烏巢
子也爾雅云桤鼠梓詩北山有桤

杉曰栝曰栝松類也而材爲良爾雅云栝栝

蔓椒曰豕椒曰猪椒曰彘椒曰狗椒以其作狗彘之氣
又曰地椒言生於地上

鈎樟曰栟亦樟之類也爾雅云栟無疵又名無疵

豫章其木甚大南都之郡因此得名今人謂之樟木

雷凡曰雷矢曰雷實

檉榆類也而秋烈其實亦如榆筴似錢之狀

楊之類亦多白楊曰高飛曰獨搖人多種於墟墓間故
曰白楊多悲風蕭蕭愁殺人水楊曰楊柳詩云楊柳依
依又云蒲柳爾雅云楊蒲柳其條可爲箭薮故左傳云
董澤之蒲崔豹云水楊卽蒲楊任矢用或言崔符亦水
楊也移楊曰移曰扶移其木大數十圍無風葉動華反
復合所謂唐棣之華偏其反而崔豹云移楊圓葉弱蒂

微風大搖故又曰一名高飛一名獨搖與白楊之名相近故郭璞云移似白楊

柳之類亦多柳曰天棘南人呼爲楊柳楊與柳實兩種說文楊蒲柳也柳小楊也斬其枝橫倒曲直挿之皆生其花謂之絮隨風如飛雪落地如鋪氈故騷人之所取興也杞柳亦曰澤柳可爲栝棧者爾雅曰旄澤柳

桐之類亦多陶隱居云有四種青桐葉皮青似梧而無子梧桐色白葉似青桐有子其子亦可食白桐與岡桐

無異惟有花子耳花二月舒黃紫色禮云桐始華者也
一名椅桐人家多植之岡桐無子今此云花便應是白
桐也白桐岡桐俱堪作琴瑟據此說則白桐者梧桐也
其材可作琴瑟諸桐惟此最大可爲棺槨左傳云桐棺
三寸爾雅云所謂櫟梧又謂榮桐木者此也詩云椅桐
梓漆爰伐琴瑟注疏家不能別椅是岡桐桐是梧桐梓
似楸別是一物爾雅謂之椅梓誤矣又有一種蘋桐夏
月繁花其紅如火又有紫桐花如百合又有刺桐其花

側敷如掌枝幹有刺花色深紅又有一種實如罌子粟
可作油陳藏器所謂罌子桐也

藥荆曰頑荆莖葉似石南

紫荆人多種庭院間即田氏之荆也

南藤曰丁公藤南史解叔謙鴈門人母有疾夜於庭中
稽顙以祈聞空中曰得丁公藤即愈訪鑿及本草皆無
乃至宜都山中見一翁伐木云丁公藤療風乃拜泣求
得之及漬酒法受畢失翁所在母疾遂愈

黃藥即藥實根也宋武帝患手瘡經年有沙門與一黃藥傳即愈又秦州出者謂之紅藥子葉似蕎麥枝根赤色

梓與楸相似爾雅注以爲一物誤矣按雜五行書曰含西種楸梓各五根令子孫孝順所以人家多種於園亭陸璣謂楸之疏理白色而生子者爲梓齊民要術云白色有角者爲梓無子爲楸是皆不辨楸梓也梓與楸自異生子不生角

蒴藿曰陸英葉似火杵莖有節節間分枝弱植高丈許
芹爲水英接骨爲木英蒴藿爲陸英謂之三英

枳椇曰木蜜蜀人謂之枸小雅南山有枸是也陸璣云
似白楊其子大如指長數寸噉之如飴故曰木蜜

烏白曰援曰柎柳田人謂之柳葉杵臭而可染皂子可
壓油爾雅云援柎柳

訶梨勒如橄欖其未熟之子隨風飄墮者名隨風子
檮似椿北人呼爲山椿江東人呼爲虎目葉脫處有痕

如檇蒲子又如眼目故有其名其材易大而不中器用
又有一種山檇極似此詩唐風所謂山有栲是也故爾
雅云栲山檇注謂栲似檇色小白生山中亦類漆俗云
櫨栲栲漆相似如一櫨即椿也

櫨曰櫨亦曰櫨其實作栲曰皂斗曰櫨斗然有二種南
土多櫨北土多櫨爾雅釋木云櫨其實栲詩秦風云山
有苞櫨並此也其釋木云栲杼與唐風云集于苞栲並
是栲木而陸璣誤謂是此耳櫨實之類極多大體皆臬

屬也可食有似栗而圓者大小有三四種周禮籩人所
謂榛實是也二三實作一棣正似桌而小者大小有三
四種爾雅所謂栲栳是也注云子如細桌江東人亦呼
爲栲桌今俗謂之爲茅桌猴桌柯桌皆其類也或曰栲
之實似櫟而小不可食

楊櫨曰空疏良材也

南燭曰烏草曰猴藥曰男續曰後草曰維那木曰黑飯
草以其可染黑飯也道家謂之青精飯亦曰牛筋言食

其飯則健如牛筋也吳越名猴菽又名染菽亦名文燭
經冬不凋春夏採枝莖秋冬採根此木類而叢生高三
五尺亦似草故號爲南燭草木圖經云人家多植於庭
院間俗謂之南天燭其實如梧桐子勻圓黑色九月熟
兒童食之極美今茅山道士採其嫩葉染飯謂之烏飯
甚甘香可以寄遠杜詩云豈無青精飯使我顏色好謂
食此能變白駐顏故仙經云子服草木之王氣與神通
子食青燭之津命不復殞並謂此也

鹽麩子曰叛奴鹽蜀人曰酸桶吳人曰烏鹽其實秋熟爲穗著粒如小豆其上有鹽如雪可以調羹戎人亦用此謂之木鹽故有叛奴鹽之名

無患子曰噤婁曰桓其子勾圓如漆今人貫爲數珠古今注云程雅問木曰無患何也答曰昔有神巫曰淫眊能符劾百鬼得鬼則以此木爲棒棒殺之世人相傳以爲器用厭鬼故曰無患

檉曰河柳曰雨師曰春柳木中脂曰檉乳本草謂之赤

檉木以其材赤故也大槩杉松之類而意態似柳故謂之檉柳爾雅曰檉河柳其材可卷爲盤合又曰櫟落郭云可以爲柕器素此赤檉也又有一種名赤楊又名水松與此相似而植之水邊其葉經秋盡紅人多植於門巷杜詩蘋檉曉夜希即此也

益智子葉似蓼荷實如李核去皮用之其中仁如梔子縮紗之類可蜜煮爲粽食昔盧循爲廣州刺史遺劉裕益智粽裕答以續命湯是此也按蘇軾記云海南產益智

智花實皆長穗而分爲三節其實熟否以候歲之豐凶
其下節以候蚤禾其上中亦然大豐則實凶歲皆不實
蓋罕有三節並熟者其爲藥也止治益於智其得此名
豈以知歲邪

木槿曰舜曰檉曰櫟曰及齊魯名王蒸其植如李五月
始花故月令云仲夏之月木槿榮此木類也爾雅云入
草例者樊光云其華朝生暮落與草同氣故在草中今
人謂之朝生暮落人多植庭院間唐人詩云世事方看

木槿榮言可愛易凋也亦可作籬故謂之槿籬

椶櫚曰椶櫚曰箭曰王蓼注云葉可爲帚蓼然有兩種
一種有須可作繩耐水一種小而無須葉可爲帚葩未
吐時割去須而取之曰椶魚淪而食之甚美南方又有
虎散枕柳冬葉蒲葵椰子檳榔多羅等與椶櫚同類

芄花曰去水曰毒魚曰杜芄曰敗華曰兒草曰黃大戟
其根曰蜀桑根苗高三二尺葉似白前及柳葉根皮似
桑根正二月花紫碧色頗似紫荊而作穗絳州出者花

黃謂之芄花爾雅云杭魚毒本草亦云可用毒魚其皮可浸汁藏梅

五倍子曰文蛤曰百蟲倉

靈壽木漢書孔光年老賜靈壽杖顏注曰木似竹有節長不過八九尺圍可三四寸自然有合杖之制不須削治也

柞木曰械曰栩曰杼爾雅云栩杼詩析其柞薪又曰柞械斯拔陸璣云柞械櫟也三蒼云械即柞也其葉繁茂

其木堅韌有刺今人以爲梳亦可以爲車軸

果類

棗之類多爾雅曰棗壺棗郭曰棗大而銳上者爲壺又
邊要棗郭云細腰者今謂鹿盧棗又曰擠白棗郭云即
今棗子白熟又曰槭酸棗今藥家所用酸棗仁孟子所
謂養其槭棘是也又曰楊徹齊棗未詳又曰遵羊棗郭
云實小而圓紫黑色俗呼爲羊矢棗孟子所謂曾皙嗜
羊棗是也又曰洗大棗郭云今河東猗氏縣出大棗如

雞卵本草云一名良棗一名美棗一名乾棗謂大棗也
爾雅又曰煮填棗未詳又曰蹶泄苦棗其子味苦暫無
實棗不著子者還味檢棗郭云還味短味

橘柚之類多爾雅曰櫟即大柚也其大如杼皮穰極
厚又曰柚條今謂之柚似橘而大皮穰稍厚然皆不可
口或言櫟即枳蓋江北無橘所以爾雅只載枳柚江南
所產有柑有橘有橙人所常食三者之間而有數品又
有枸櫞生於南方土人謂之香櫞如瓜以穰厚者爲美

梅之類多爾雅曰梅枌又曰時英梅梅類而實小謂之雀梅

梨之類多爾雅曰樾蘿山梨也又曰梨山檮野出之梨小而酢者又曰杜甘棠詩所謂蔽芾甘棠也謂之棠梨其花謂之海棠花其實謂之海紅子又曰杜赤棠白者棠此別棠梨赤白之異也

木瓜爾雅曰楸木瓜

豆蔻曰草果亦曰草豆蔻苗葉似山薑杜若輩根似高

良薑花作穗可愛故杜牧云豆蔻梢頭二月春南人亦採其花淹藏以當果品

葡萄藤生傳自西域史記云大宛以葡萄爲酒富人藏葡萄酒至萬餘石久者十數歲張騫使西域得其種而還中國始有又有一種曰蓼蓂謂之山葡萄野出其實如葡萄而小亦堪爲酒其莖主嘔逆斷其兩頭節炊之有汁出如通草

蓬蘽曰覆盆曰陵藟曰陰藟今人謂之莓大小有數種

有蔓生者有叢生者有樹生者惟叢生者大而可愛謂之蓬蘽其樹生者謂之覆盆子亦謂之西國草亦謂之畢楞伽爾雅云莖藾盆其鋪地蔓生者曰地莓爾雅云蘼薺者地莓也

蓮爾雅曰荷芙蕖其莖茄其葉蓮其本莖其葉萑萑其實蓮其根藕其中的的中薏按本草謂近根處白莖也實謂蓮房的謂蓮子亦謂之藪爾雅曰的藪薏謂蓮子中苦心又按本草藕實莖一名水芝丹一名蓮宋太官

作血蝕庖人削藕誤落血中遂散不凝自此鑿家方知其散血也

芡曰蓴子曰鉤曰芡曰鴈喙實曰鴈頭實曰雞雍實本草曰雞頭實爾雅鉤芡葉大如荷皺而有刺俗謂之雞頭盤花下結房形類雞頭實正圓如榴核大根謂之蓂莢莖謂之蓴蓂亦堪爲茹

芡實即菱也俗謂之菱角可以當糧菱亦作菱爾雅菱葢攔注云今亦謂之菱攔

櫻桃曰朱棃曰麥甘酣曰楔曰含桃曰荆桃曰李桃曰奈桃爾雅云楔荆桃禮含桃先薦寢廟

柿烏者謂之柶

木瓜短小者謂之檟檣亦曰蠻檣俗呼爲木梨禮記謂之檣梨鄭氏誤謂梨之不臧者

甘蔗有三種赤色者曰崑崙蔗白色者亦曰竹蔗亦曰蠟蔗小而燥者曰荻蔗

芋曰土芝其母曰芋魁史記蜀卓氏云汶山之下沃野

有蹲鴟至死不飢正謂芋魁蓋其形似也

烏芋曰藉姑曰水萍曰白地栗曰河鳧茨曰槎牙今人謂之茨菰其葉曰翦刀草曰燕尾草

鳧茨爾雅曰芍鳧此

荔枝亦曰離支始傳於漢世初出嶺南後出蜀中故蜀都賦云旁挺龍目側生荔枝南海藥譜云荔枝熟人未採則百蟲不敢近才採之則烏烏蝙蝠之類無不殘傷然亦不必荔枝諸果皆然東觀漢記云南海舊獻荔枝

龍眼十里一置五里一堠奔馳險阻道路爲患孝和時
唐羌上書言狀帝詔太官勿復受獻蓋此物易變一日
色變二日味變三日色味俱變古詩云色味不踰三日
變舊時採貢以蠟封其枝或蜜漬之而近代奸幸之徒
連株以進南人苦之不知土地所產之異而輒爲人患
何也無乃尤物者與

龍眼曰益智曰龍目曰亞荔枝曰荔枝奴其味清甜荔
枝才過即食龍眼

桃之類多爾雅曰旄冬桃今謂之旄桃藤生出山谷或
言即寒桃也十月熟故謂之冬桃又曰桴桃山桃今野
出之桃也味酸苦不解核桃之實乾而不落其中實者
曰桃梟曰梟景本草云主殺百鬼精物上古有神荼與
鬱壘兄弟二人桃樹之下閱百鬼無理者縛以葦索飼
虎今人本此而作桃符

李之類多爾雅曰休無實李一名趙李又曰瘞接慮李
今之麥李即青李也又曰駝赤李此赤李著粉者也陶

隱居云李以姑熟所出南居李解核如杏子者爲佳
菴羅果若林檎而極大佛書多言之

石榴本草謂之安石榴爾雅云劉劉杙劉與榴通用故
也一名丹若一名若榴其甜者又名天漿入藥多用酸
榴

橄欖最療鰕鮓毒其木作楫撥著魚皆浮出故知物有
相畏者也

榛有三四種桌類也似桌而小正圓

蟲魚類

蟬之類多爾雅及他書多謬悠惟陶弘景之注近之本
草蚱蟬注云痲蟬也痲蟬雌蟬也不能鳴者蟬類甚多
莊子云螻蛄不知春秋則是今四月五月小紫青色者
而離騷云螻蛄鳴兮啾啾歲暮兮不自聊此乃寒蟬耳
九月十月中鳴甚悽急又二月中便鳴者名螳母似寒
蟬而小七月八月鳴者名蛸螳色青今此云生楊柳樹
上是詩云鳴蜩嘒嘒者形大而黑昔人噉之故禮有雀

鷓鴣范范有冠而蟬有綏亦謂此蝸復五月鳴俗云五月不鳴嬰兒多天今其療亦專主小兒也按陶此說今實考其物寒蟬蟬母蛩類也蛩蛩與蝸蟬類也蛩類在階除間及叢薄中夜鳴日不鳴蟬類在木上日鳴夜或鳴字林云蟬蟬蛩也莊子所謂蟬蛩者蟬類之別名爾而正名蟬蛩乃是寒蟬又蟬蛩條本經云一名蟬蛩寒蟬與蟬蛩類也故名號相亂凡本草所載名號有相亂者皆是物類近似故有互名非若他傳釋有名號相亂

者非互名也皆是訛謬蝓蟬一物爾方言云楚謂蟬爲

蝓宋衛謂之塘蝓陳鄭謂之蜋蝓秦晉謂之蟬究而言

之實爲二物夏小正云五月塘蝓鳴七月寒蟬鳴是其

義也今就而驗之有四五種有大如雀黑色其鳴震巖

谷者是爾雅所謂蜩馬蟬是也五月以前鳴者似大蠅

而差大青色或有紅者夜在草上日在木上聲小而清

亮此則正謂之蝓七月以後鳴者似蜩色亦斑此則正

謂之蟬亦名蜩螗而陶謂七八月鳴者名蜩螗色青此

誤也立秋已後青紅二色者盡無之矣獨斑蟬盛焉有
一種如大黃蜂黑色倦飛亦倦鳴故謂之瘧蟬即蟬之
唯者爾本草蚱蟬是也夏秋俱有蘇恭云蚱者鳴蟬也
諸蟲獸以雄者爲良以陶說爲誤後來注釋者又引玉
篇云蚱者蟬聲也明蘇說是且陶謂之瘧蟬豈妄哉蓋
據當時所用之名物而言之醫家多用蟬蛻而希有用
蟬者故不親識其所用之名物以意測度又尋經引傳
以釋證之爾且萬物之理若非的識其情狀求之經傳

展轉生訛况爾雅玉篇何可盡信舊云蟬是蜺娘所轉
九久而化成至夏便登木而蛻此說非也蜺娘轉九但
成其子而蟬正是蜺娘化爾又糞中蟻螬及載蟲之類
亦化爲蟬也蟬脫曰枯蟬曰伏蛻

龜之類多爾雅一曰神龜二曰靈龜三曰攝龜四曰寶
龜五曰文龜六曰筮龜七曰山龜八曰澤龜九曰水龜
十曰火龜神龜龜之最神者靈龜本草謂之秦龜亦曰
蜃螭其甲有文似瑤瑁而差薄耳故名鼈皮此龜一名

蜺螭俗呼靈螭能鳴多出涪陵其甲可以卜攝龜小龜也一名嚙龜一名來蛇龜好食蛇故亦謂之呬蛇龜郭云腹甲曲折解能自張閉江東呼爲陵龜或言此龜乃蛇所化故頭尾似蛇俗呼鼃龜即此寶龜傳國者所寶文龜甲有文彩者河圖曰靈龜負書丹甲青文筮龜常在蒼叢下者龜策傳曰蒼滿百莖其下必有神龜守之山澤水火之龜皆其所生之處也火龜蓋生於火者亦猶火山國所出火鼠是也郭氏謂物有含異氣者不可

以常理推龜溺醫家謂之石腦油最難得惟以鑑照之
龜見影則失溺急以荷葉承之又法以紙炷火上煖熱
以點其尾亦致失溺

貝即瑇瑁也說文云貝海介蟲也其甲人之所寶古人
以爲泉貨交易

蝨之類亦多爾雅云蟲蝨蠶草蝨負蠶蜚蝨蜈蚣蝨
蜈蚣土蝨蟻窠按蟲蝨蝗也草蝨草蟲也亦謂蚱蜢蝨
蝨一名蜈蚣即一種大青蚱蜢股長而鳴甚響蜈蚣郭

云似蚣蝢而細長飛翅作聲者蟻谿似蝗而小斑色多
生園中郭云今謂之土蝶以其在土中也

蝗之類多爾雅曰蚍蜉大蝗小者蝗螫打蝗蟹飛蝗其
子蚍按蟻亦作蝗大蝗即馬蟻也大而黑郭云俗呼馬
蚍蜉小蝗謂小黃蟻也以其種極多故專其名打蝗是
一種大蟻赤色斑駁者飛蟻有翅而飛者凡蟻老則皆
生翅能飛遂化爲他類矣蚍蟻卵也似飯粒亦可爲醬
周禮醢人蜃蚍醢

蠶蠶之類多爾雅曰次蠶蠶蠶蠶蠶土蠶蠶草蠶蠶
按方言云關西秦晉之間謂之蠶蠶關東趙魏之郊謂
之蠶蠶在土中者曰土蠶蠶在草中布網者曰草蠶蠶
土中者能毒人俗謂天蛇又曰蠪蛸長跣詩所謂蠪蛸
在戶即小蠶蠶長脚者俗呼喜子又曰王蛸蠶蠶類
也一名蠪蛸穴居布網穴口有蓋河北人呼蛸蛸

蠶之類多爾雅曰蠪桑繭讐由樗繭棘繭橐繭虻繭繭
此皆蠶類吐絲成繭者食桑葉爲繭者曰蠪蓋蠶也或

云野蠶食樗葉棘葉桑葉爲繭者曰讐由食蕭葉爲繭者曰虻蕭蒿也原蠶者再熟之蠶也淮南子原蠶一歲再熟然王法禁之者爲殘桑也周禮禁原蠶者注云爲其傷馬今以蠶爲末塗馬齒即不能食草以桑葉拭去乃還食此明蠶馬類也物莫兩盛

蟹之類多而螃蟹爲勝其螯上有毛仙方以化漆爲水服之長生以黑犬血灌之三日燒之諸鼠畢至雖云取無時然未被霜以前甚有毒不可食或曰八月一日每

蟹取稻芒長寸許東行輸送海神過八月乃可取也又有彭蜺彭蜎擁劔蝟蜋蚶並生海中唯彭蜺不擇地生多於溝渠間其膏可塗濕癬疽瘡肉不可食令人吐下至困蔡謨誤食者此也彭蜎吳人語訛爲彭越南人謂之林禽可食作蜎尤佳小者名擁劔一名桀步一名執火其螯亦此三種皆如小蟹而蝟蜋一名蜎大者徑尺小者如螃蟹大隨潮退殼一退一長兩螯至彊故云能與虎鬪蟻如升大頗似蝟蜋而殼銳

蜂之類多本草蜂即蜜蜂也大黃蜂即土蜂也一名蜚
零穴土以居今宣城所生蜂兒者土蜂也木蜂即瓢
蜂也結窠如甑在木上者

蠋蠃曰土蜂曰螺贏曰蒲盧俗謂之蠋蠃槌泥入於屋
壁間及器物旁作房或雙或隻亦入竹管中以泥封其
口其類不一也凡蜂蟻皆不能生子只取他物吮成而
陶隱居乃謂此生子如粟米大在房內仍取他蟲置其
中以擬其子大為糧也以詩云螟蛉有子螺贏負之爲

謬矣後來人有壞其房而看之果見有卵如粟在死蟲之上皆如陶所說此蓋不究其義也諸蟲在蟄尚不食况其形體未定猶在窠中時何得有饑飽也壞其房而見卵與死蟲者是變與未變爾將其故房看之其蟲殼皆如蛻形則非為物所食明爾且蚱蟬生於蛻蝗衣魚生於瓜子龜生於蛇蛤生於雀白鴿之相視負蝨之相應其類不一然則螟蛉螺贏不爲異矣

蚯蚓爾雅曰蝻蚓蜚蠊亦謂之蜚蠊江東呼寒蚓

蜻蜓爾雅曰叮蛭負勞亦謂之蜻蛉

螳螂爾雅曰不過螳螂其子蜉蝣又曰莫貊螳螂蜉謂
螳螂有斧蜉蝣亦曰食尾曰蜉蝣

蚰蜧關東謂之螻蜧故爾雅曰螻蜧入耳以此蟲能入
人耳故得入耳之名

蜚爾雅曰蜚蠊郭云蜚即負盤臭蟲按此亦謂之負
蟻即草蟲也春秋書蜚以其能害稼本草謂之蜚蟲亦
謂之蜚蠊

蜺螭爾雅曰蜺螭螭莊子曰蜺螭之智在於轉丸

蜺木中蠹蟲也爾雅曰蜺蜺

壤俗呼山羊有長角斑黑色喜齧桑葉及橘柚爾雅曰

壤齧桑

蜺螭似蜺螭而小有文彩爾雅曰蜺螭渠畧又曰蜺螭
蜺郭璞云江東呼蜺螭以有金色

守瓜者瓜瓠之葉上黃甲小蟲能飛者爾雅曰蠃與父
守瓜

穀蠹米穀中小黑蟲也爾雅曰蛄蜚強殭建平人呼爲
蚌子

蜈蚣爾雅曰蒺藜蝻蛆性能制蛇見大蛇則噉其腦蛇
不動而畏蚯蚓每遇蚯蚓亦不敢動蚯蚓以涎繞其足
盡落

馬陸似蜈蚣而小尤多脚不能毒人曰百足曰馬軸所
謂百足之蟲至死不僵者此也

蝦蟆之類多以蟾蜍爲上曰鰻曰去甫曰苦蠶昔張暢

弟收爲獐犬所傷醫云宜食蝦蟆鱸收甚難之暢含笑
先嘗蓋此物但入藥用而非可食也其肪塗玉刻之如
蠟或不可得但取肥者剉煎膏以塗玉亦軟古玉器有
奇特非雕琢人功者多是昆吾刀及蝦蟆肪所刻也爾
雅螯蟆有一種生於田中大者三四枚重一觔南人名
爲水雞亦名蛤又一種生山谷中黑色肉紅名石鱗魚
並可食其小者名鼃其大於鼃而青色者曰青鼃凡蝦
蟆之類皆不交合惟雌雄相對吐沫漸成魚子遂變而

成科斗爾雅云科斗活東亦曰活師古人科斗書蓋取象於此

馬蛭爾雅云蝦馬蛭郭云馬蠲蚘俗呼馬蛭方言云北燕謂之蛆螺其大者謂之馬蚘蚘即蛭也

載蟲曰蛭其毛能螫人故爾雅曰蛭毛蠹又曰螺蛭螫者黑毛蟲也其毛皆能射人

蟻螬爾雅云蟻螬蟻螬糞土中大白蟲也本草一名蟻螬一名蜚螬一名勃齊

蝤蛸爾雅云蝤蛸蝸木中蠹蟲也方言關東謂之蝤蛸
梁益之間謂之蝸

鼠負瓮底白粉蟲也爾雅云蟠鼠負又曰蚰威委黍詩
蚰威在室蠹蛸在戶

牛蠹蠅類噉牛馬血爾雅云强蜥

衣魚亦謂之蠹魚以能蠹衣裳書帙亦謂之蛎魚亦謂
之蟬爾雅云蟬白魚

莎雞曰酸雞曰樗雞曰天雞曰樗鳩曰翰爾雅云翰天

雞黑身赤頭似斑貓

土蛹爾雅曰國貉蟲蠻郭云今呼蛹蟲爲蠻

螢火爾雅云螢火即炤本草一名夜光一名放光一名
熠燿詩云熠燿宵行呂氏春秋云腐草化爲螢

螻蛄曰螢曰天螻曰蝻曰蛭螻亦曰螻蛄故爾雅云螢
天螻又曰蝻蛭螻方言云南楚謂之杜拘此物頗協神
鬼昔人獄中得其力者今人夜忽見出多打殺之言爲
鬼所使也荀子所謂梧鼠五技而窮蔡邕勸學篇云碩

鼠五能不成一技者此物爾魏詩所謂碩鼠者大鼠也
蝸牛曰蛞蝓曰陵螽曰土蝸曰附蝸爾雅蚘羸螭蚘凡
羸之類皆負殼惟此能脫殼而行頭有兩角故曰蝸牛
水蛭曰蛟曰至掌

蠓之類多爾雅云蠓蟻蠓似蚋而小斜陽則羣聚鬪飛
蜥蜴之類多爾雅云蜥蜴蜥蜴守宮也今按小而
青者曰蜥蜴大而黃者曰蜥蜴最小在牆間砌下者曰
守宮種類既異而此釋爲一物恐亦未審也又按本草

蜥蜴謂之石龍子一名山龍子一名石蜴楚人謂之蛇
醫或謂之蝾螈青尾有五彩蠃蜒似蜥蜴而大黃色亦
謂之蠃蜒也守宮似蜥蜴而小在屋壁間故名守宮故
東方朔謂非守宮則蜥蜴也守宮又名蠃虎舊云以朱
飼之滿三斤殺之乾末塗女子身有交接事便脫不爾
如赤誌故謂之守宮

蝟有兩種一種作豬蹄者又名蠃猪一種作鼠脚舊云
蝟能跳入虎耳中而見鵲便仰腹受啄物有相制如此

鼯鼠曰隱鼠曰鼯鼠形類鼠而肥多膏黑色無尾長鼻
常穿耕地中行旱歲則爲田害

蠖屈伸蟲也爾雅云蠖蚺蠖

蜚曰蟋蟀曰青蛰楚人謂之王孫幽州人謂之促織秋
至則鳴故曰促織鳴懶婦驚

鼯鼠即飛生也一名鼯鼠

青蛰一名螻蛄搜神記曰南方有蟲名蜉蝣如蟬大卒
美可食其子如蠶種取其子則母飛來雖潛取必知處

殺其母塗錢子塗貫用錢則自還淮南子萬畢云青蚨
一名魚伯以母血塗八十一錢以子血塗八十一錢置
子用母置母用子皆自還也或云自是雄雌不相捨爾
蛇之類多爾雅曰跌蛩郭云蝮屬大眼最有毒今淮南
人呼蛩子又曰騰騰蛇騰音滕郭云龍類也能興雲霧而
游其中淮南子云蟒蛇騰又曰蟒王蛇蟒蛇之大者謂
之王蛇又曰蝮虺博三寸首大如擘江淮以南曰蝮江
淮以北曰虺

鯉鱣鰻鮎鯢鮪爾雅無異名鰻今之黃鱣魚短鼻口在
頷下體有三行甲無鱗大者長二三丈亦能化龍鮪今
之鰻魚也

鮒廣雅云鮒魚也

鯊爾雅云鯊鮐小魚體圓而有點文常張口吹沙故亦
名吹沙

鮠爾雅云鮠黑鰓郭氏謂即白魷江東呼爲鮠臣又疑
即黃魚以背黑故亦名黑鰓

鮓爾雅云鰓鰓今泥鰓也似鱖而小

鰓爾雅云鰓大鰓小者鮓即鰓也郭云今青州呼小鰓
爲鮓按鰓與鰓音與義同又本草作蠡一名鰓舊言是
公鰓蛇所化頭有文

鰓爾雅云鰓大鰓小者鮓郭云鰓似鮓而大白色

鰓爾雅云鰓當鰓海中黃魚也似鰓而大鱗肥美多鰓
江東呼其最大者爲當鰓

鰓爾雅云鰓鰓刀郭云今之鰓魚也亦呼爲鰓魚按鰓

魚所在有之

鮠爾雅云鮠鮠似鰕而小眼赤多生溪澗傳麗水底難
網捕

鰕爾雅云鰕鰕

鰻爾雅云鰻鰻今鰻魚亦呼鰻鰻徽州一種鰻頭似蝮
蛇背有五色生溪澗

鰻之類多爾雅曰鰻大鰻郭云鰻大者出海中長二三
丈須長數尺今青州呼鰻爲鰻

羸之類多爾雅云羸小者蝓郭云螺大者如斗出日南
漲海中可以爲酒杯按今所謂鸚鵡杯者出南海

蚌之類多爾雅云蜃小者珧即小蚌也一名玉珧可飾
佩刀削詩傳云天子玉琫而珧琕是也山海經激女水
中多蜃珧今廣州東南道極多人取以摩作碁子鬻之
鼉亦作鮑狀如鯪鯉長一二丈者能吐氣成霧致雨善
攻碕岸性嗜睡常閉目極難死聲甚可畏其皮可冒鼓
凡鼃鼉之老者能變爲邪魅或云多年鼃入水化爲龍

梁周興嗣常食其肉後爲鼉所噴便爲惡瘡實彊靈之物不可輕殺

鯢爾雅云鯢大者曰鰕即雌鯨也大者長八九尺狀似鮎魚脚前似獼猴後似狗聲如小兒啼今洞庭有之

禽類

佳爾雅謂之鳩鵒亦曰祝鳩今所謂鷦鷯也謹愿之鳥凡鳥之短尾者皆謂之佳惟夫不專名焉故指佳爲鳩鵒也鳩方扶反鵒方浮反

鷓鴣爾雅謂之鷓鴣居物反鷓鴣音骨嘲今謂之鷓鴣似山鵲而小短尾青黑色多聲江東亦呼爲鷓鴣廣雅謂斑鳩誤矣斑鳩即鷓鴣也

鳴鳩爾雅曰鷓鴣即布穀也一名桑鳩一名繫穀江東呼爲獲穀禮記謂之鳴鳩鷓鴣苦八反鷓音菊

鷓鴣爾雅曰鷓鴣郭云小黑鳥鳴自呼江東名爲烏鷓按此似鷓鴣無冠而長尾多在山寺厨檻間今謂之烏

鷓鴣音及

按玉篇廣韻無鷓字惟有鷓字音及

鷓步丁反

鵙鵙爾雅曰王鵙鳬類多在水邊尾有一點白故揚雄云白鵙舊說鵙類誤矣鵙七徐反

鳬鵙陸機云大如鵙青灰色卑脚短喙水鳥之謹愿者也

鵙爾雅曰鵙鵙鵙音格鵙鵙音忌欺郭云今江東呼鵙鵙爲鵙鵙亦謂之鵙鵙

鵙爾雅云天狗魚狗也似翡翠而小青碧可愛鵙音立鵙爾雅曰天鵙郭云大如鵙雀色似鵙好高飛作聲江

東名之曰天鵲音綢繆之繆按此雀類似鶉而尾小長
以其能鳴故人多養之俗呼告天所在寒月多有之鶉
音樂

鵠爾雅曰鵠鵠今之野鵠鵠音六鵠力于反

鵠爾雅曰鵠鵠即鵠鵠也

鵠爾雅曰烏鵠鵠音洛郭云水鳥也似鵠而短頸腹翅
紫白背上綠色江東呼烏鵠鵠音駁

舒鴈爾雅曰鴈

舒鳧爾雅曰鶩鴨也

鵒爾雅曰鵒鵒水鳥也今亦謂之鵒鵒似鳧脚高毛冠
郭云江東人家養之以厭火災

鶡爾雅曰鶡鶡音烏鶡音澤鶡鶡也形極大喙長尺
餘頷下有胡大如數升囊好羣飛沉水食魚俗謂之淘
河許慎云鵬也

鶡爾雅曰天鷄鶡音汗逸周書曰蜀人獻文鶡文鶡者
若鶩雉按今有吐錦雞蓋雉類惟蜀中有之仰日吐錦

甚有文彩

鸞爾雅曰山鵲今喜鵲也郭氏謂似鵲而有文形長尾
背脚赤鸞音握

鷦爾雅曰負雀鷦音淫郭云鷦鷯也江南人呼之爲鷦
善捉雀因名云按此即今之小鷦也蓋鷦類南方無鷦
唯呼此爲鷦

鷦爾雅曰鷦老鷦音彖郭云鷦鷯也俗呼癡鳥字林云
句喙鳥按此蓋鷦類能捕雀句喙目圓黃可畏如拳大

小者猶俊

鳴鵲爾雅曰剖葦注云好剖葦皮食其中蟲因名云江東呼蘆虎似雀青斑長尾鵲音遼

桃蟲爾雅曰鷦其雌鷦音艾似黃雀而小一名鷽鷽一名鷽鷽一名桃雀俗呼巧婦

鳳凰爾雅曰鷽鳳其雌凰神鳥也其雛曰鷽鷽雞冠蛇頸魚尾龍文龜背燕頤前後五色備舉高六尺許京房云高丈二出於東方君子之國飛則羣鳥從以萬數非

梧桐不栖非竹實不食晨鳴曰發鳴朝鳴曰上翔晝鳴
曰滿昌昏鳴曰固常夜鳴曰保長鳳古作朋字

鵙鵙爾雅曰鵙渠雀屬也長尾背上青赤色腹下白頸
下黑飛則鳴行則搖

鷺斯爾雅曰鷺鷥亦謂之雅鳥蓋雀類差小多羣飛食
穀粟俗呼必鳥鵙音匹聲相近

鴛鴦爾雅曰鴛母即鴛也青州呼鴛母田鼠所化鴛鴦音
如謀

蜜肌爾雅曰繫英英雞也喙啖石英故得名焉

鴛爾雅曰鴛周即子規也多出蜀鴛郡故名焉蜀主望帝化爲子規鴛希規反

燕玄鳥也爾雅曰鳬陸璣云齊人謂之乙燕有二種爾雅又曰燕白脰鳥則知此爲紫燕矣

鷓鴣爾雅曰鷓鴣陸璣諸儒皆謂爲巧婦誤看詩文也今按郭氏說此及方言皆謂是鷓類據下言茅鷓怪鷓則此應是鷓無緣得是巧婦鷓鷓鴣音遙寧決

狂爾雅曰茅鴟郭云今鵲鴟也似鷹而白

白鴟爾雅曰怪鴟廣雅謂之鴟鵂郭云今關東呼此屬
爲怪鳥

梟爾雅曰鴟即訓狐日瞑而夜作賈誼所賦鴟鳥是也
其肉甚美可爲羹臠又可爲炙漢供御物說文云梟食
母不孝之鳥故冬至捕梟磔之字從鳥首在木上或說
即今伯勞也食母

爰居爾雅曰雜縣海鳥也嘗止於魯東門之外又漢元

帝時琅邪有大鳥如馬駒時人謂之爰居

鴈之類多皆雀屬也爾雅曰老鴈鷓鴣音晏雀也又曰
春鴈鵠夏鴈竊元秋鴈竊藍冬鴈竊黃桑鴈竊脂棘
鴈竊丹行鴈喈喈宵鴈嘖嘖竊古淺字言其色之淺喈
喈音即嘖嘖音責皆其聲然也或取其毛彩或取其鳴
聲以命名鴈雖雀屬皆以時見亦猶鷺鴈然農家須其
鳴以候時故又命以四時也桑鴈郭云俗謂青雀今名
鴈紫性慧可教桑棘之鴈多在此木故名行鴈者多在

籬落如雞雉然不飛去故名宵鴈者能傳衣故名鵠音
汾鵠敕倫反

鷓鴣爾雅曰戴鷓鴣彼及反鴣皮及反鷓女金反郭云
鷓即頭上勝今亦呼爲戴勝鷓鴣猶鷓鴣語聲轉耳按
方言關東曰戴鷓

鷓爾雅曰澤虞鷓字往反郭云今姻澤鳥似水鴉蒼黑
色常在澤中見人輒鳴喚不去有象主守之官因名云
俗呼護田雞按此鳥亦多在田中閩人呼爲姑雞紡以

其聲類紛聲且聒聒不輟

鷓鴣爾雅曰鷓於計反

鷓鴣爾雅曰其雄鷓牝庫鷓類此別其雌雄之異名耳
鷓鴣墓所化庫音脾

鷓鴣雅曰沈鷓似鷺而小尾白俗呼水鴉好沒故曰沈
鷓鷓音施

鷓頭爾雅曰鷓鷓於鳥反郭云似鷓脚近尾畧不能行
江東謂之鷓許交反按此鳥類野鴨而文彩不能行多

溷野鴨羣中浮游

鷓鴣爾雅曰寇雉郭云鷓大如鴿似雌雉鼠脚無後指
岐尾爲鳥慙急羣飛出北方沙漠地

雉爾雅曰老鷓郭云木兔也似鷓鴣而小兔頭有角毛
脚夜飛好食雞臣疑此即訓狐以其首似兔故有此等
名鷓音兔

鷓爾雅曰鷓鴣音突郭云似雉青身白頭

狂爾雅曰鷓鴣山海經云栗廣之野有五采之鳥有冠

名曰狂鳥

皇爾雅曰黃鳥即黃鸝也一名倉庚一名商庚一名鷺
黃一名楚雀一名搏黍一名黃離留陸璣云常以椹熟
時來故里語曰黃栗留看我麥黃椹熟不故又名黃栗
留

翡翠爾雅曰鵲音律其羽可以飾器物

鵲爾雅曰山鳥郭云似鳥而小赤背穴乳出西方

蝙蝠爾雅曰服翼今亦謂之蝙蝠鼠所化故又名仙鼠

晨風爾雅曰鷦似鷦而小青黃色燕頤

鷽爾雅曰白鷽鷽鷽音楊厥郭云似鷽尾上白

鷽爾雅曰鷽母郭云似烏鷽而大黃白雜文鳴如鷽聲
今江東呼爲蚊母俗說此鳥常吐蚊因以名云鷽鷽音
田文

鷽爾雅曰須羸鷽鷽也似鳧而小其膏可瑩刀劔古詩
云馬銜苜蓿葉劔瑩鷽鷽膏鷽羸音梯螺

鼯鼠爾雅曰夷由似蝙蝠而大翅尾長三尺許背上蒼

父色脚短爪長飛且乳故又名飛生聲如人呼食火烟
能從高赴下不能從下升高鼙音吾

鷺爾雅曰啄木鷺音列今亦謂之斲木鳥常啄木剝剝
然取蠹蟲食

鷺爾雅曰春鉏白鷺也亦曰鷺鷥陸璣曰汶陽謂之白鷺
鷺齊魯謂之春鉏遼東樂浪吳揚皆謂之白鷺

雉之類多爾雅曰鷓雉鷓雉鷓雉鷓雉秩秩海雉鸛山
雉韃雉鷓雉雉絕有力奮伊洛而南素質五采皆備成

章曰鵬江淮而南青質五采皆備成章曰鵠南方曰鵠
東方曰鷗北方曰鷗西方曰鷗鷗音遙鷗雉即鷗雉也
青質而有五采者鷗音鷗鷗音卜鷗雉即鷗雉也朱冠
綠臉項背有文腹下黃赤大如雞雉者有文彩據文勢
是如此郭氏離此爲四物誤矣秩秩者即海雉也郭云
如雉而黑在海中山上鷗音狄即山雉也此與鷗雉是
一種小異亦有文彩郭云長尾者鷗音汗即鷗雉也今
謂之白鷗似鷗而大白色紅臉可愛鳥之健勇者惟雉

雉之有力者曰奮翬鷄皆所產之異鳥鷄鷄鷄皆所呼之異鳥音儔鷄音遵

鷄鷄爾雅曰鷄鷄如鷄短尾射之銜矢射人鷄鷄鷄鷄音歡團福柔此鳥一名嬖羿言雖羿亦懈惰不敢射之

獸類

麋之類多爾雅曰麋牡麋牝麋其子麋其跡躔絕有力狄鹿牡麋牝麋其子麋其跡速絕有力麋麋牡麋牝麋其子麋其跡解有力斡按麋麋也麋其總名也麋麋麋

麇麇麇麇麇麇音咎辰香加迷堅侯栗鉏又曰麇大鹿
牛尾一角麇音炮即麇也漢武帝郊雍得一角獸若麇
然謂之麟即此也麇音京又曰麇大麇旄毛狗足今謂
之麇音几旄毛獾長毛也旄音冒又曰麇父麇足其脚
似麇食栢葉而臍甚香父音甫

狼爾雅曰狼牡獠牝狼其子獠絕有力迅又曰豺狗足
即狼也獠音亦

兔爾雅曰兔子嬖其跡迅絕有力欣

白虎魑黑虎豺無前足晉太康元年召陵扶夷縣檻得一獸似狗豹文有角兩脚即此類也或說豺似虎而黑無前兩足豺音含魑式六反豺足滑反

熊羆之屬爾雅曰羆如熊黃白文羆似熊長頭高脚猛憨過于熊其脂似熊白而麤又曰熊虎醜其子狗絕有力麤醜類也麤音咸又曰羆如小熊竊毛而黃郭云今建平山中有此獸狀如熊而小俗呼爲赤熊即羆也音頽

狐狸之屬爾雅曰狸狐貍貍醜其足蹠其跡內蹠音煩
掌也內音狃指頭著地處又曰狸子隸貍子貍隸音曳
貍下各反貍似狐善睡亦謂之貉郭云今江東呼貉爲
狢狢

羆爾雅曰羆羆似狸羆羆音樞萬林云羆似狸而大一
名羆郭云今山民呼羆虎之大者爲羆羆

麋羊爾雅曰麋大羊音靈陶隱居云其角多節蹶蹶員
繞者爲真惟一邊有節節疎大者爲山羊按此二角俱

似羊而大在山崖間又曰獬如羊音元郭云似吳羊而大角角橢出西方

犀兕之屬爾雅曰兕似牛如野牛青色重千觔一角長三尺餘形如馬鞭柄其皮堅厚可制鎧又曰犀似豕今出交趾形似水牛豬頭三角一在頂上一在額上一在鼻上者即食角也小而不橢好食棘亦有一角者其通天犀乃是水犀角上有一白縷直上至端能出氣通天置露中不濡置屋中烏鳥不敢集屋上置米中雞皆驚

駭故亦謂之駭雞犀抱朴子曰通天犀角三寸以上者刻爲魚銜之入水水常爲開三尺

獼猴之屬爾雅曰蒙頌獼狀郭云即蒙貴也狀如雌而小紫黑色可畜健捕鼠勝於猫九真日南皆出之獼亦獼猴之類又曰獼援即獼也獼善攀援

獼獼爾雅云獼獼類羆虎爪食人迅走山海經云少咸山有獸狀如牛而赤身人面馬足名曰窵窵其音如孩兒食人所說與此異獼烏八反獼羊主反

騶爾雅云騶如馬一角不角者騶騶音攜郭云元康八年九真郡獵一獸大如馬一角角如鹿茸此即騶也今深山中人時或見之亦有無角者

獠亦謂之獠爾雅云獠子獠獠音湍窶獠似豕而肥猶爾雅云猶如麕善登木說云猶獠屬也麕音几

狒狒爾雅云狒狒如人被髮迅走食人狒扶味反梟羊也俗呼山都人面長脣見人則笑笑則脣蔽其面左手操管

蜚爾雅曰蜚印鼻而長尾狀如獼猴而大黃黑色尾長數尺似獼尾末有岐鼻露向上雨即以尾塞鼻或以兩指所在山中有之

麇麇爾雅云麇麇短脰

贅有力贅呼犬反郭云西海大秦國有養者似狗多力獼惡

獼爾雅云獼迅頭郭云今建平山中有獼大如狗似獼猴黃黑色多髯鬣好奮迅其頭能舉石摘人獼類也獼

音據

猩猩爾雅云猩猩小而好啼人面豕身長髮能言語好飲酒醉則人髡其髮爲髮聲似小兒啼

狻麇爾雅云狻麇如虢貓食虎豹即師子也漢順帝時疎勒國獻師子似虎正黃有額彫尾端茸毛大如斗

麀爾雅云麀麀身牛尾一角此瑞應獸也黃色圓蹄馬足角端有肉麀即麟字

鼠之屬多爾雅曰鼯鼠音憤地中行者食竹根今人謂

之竹鼯伯勞所化廣雅謂之鷄鼠又曰鼯鼠刮忝反大戴禮云田鼠者鼯鼠也郭云以頰裏藏食者又曰鼯鼠鼠之最小者郭氏云謂有螫毒者一說甘口鼠也又曰鼯鼠音斯似鼯鼠夏小正曰鼯鼯則穴蓋九月也又曰鼯鼠弋救反狀如鼯赤黃色大尾能啖鼠俗呼鼠郎江東呼爲鼯即莊子云騏驎騑騑捕鼠不如狸鼯是也又曰鼯鼠音劬小鼠也一名鼯鼠亦謂之鼯鼯又曰鼯鼠鼯鼠音時吠並未詳又曰鼯鼠音石郭云形大如鼠頭

似兔尾有毛青黃色好在田中食粟豆關西呼爲鼯鼠
鼯音雀又曰鼯鼠鼯鼠音問終並未詳又曰豹文鼯鼠
音廷常在木上如鼠大其文似虎豹今深林中甚多漢
武帝時得此鼠孝廉郎終軍知之賜絹百疋又曰鼯鼠
古覓反郭云今江東山中有鼯鼠狀如鼠而大蒼色在
木上音覓按郭氏此說又與鼯鼠相類

馬之類多爾雅曰騊駼馬音陶徒字林云北狄良馬也
郭云色青又曰野馬郭云如馬而小穆天子傳云野馬

日走五百里又曰駮如馬倨牙食虎豹倨即鋸也山海經云中曲山有獸如馬而身黑三尾一角音如鼓名駮食虎豹可以禦兵又曰駮蹄趺善陞甌駮蹄者其蹄如趺秦時有駮蹄苑甌山嶺也郭云形似甌上大下小駮駮音昆硯又曰駮駮枝蹄趺善陞甌枝蹄如牛蹄是也牛枝蹄馬溷蹄又曰小領盜驪穆天子傳云天子駕八駿右盜驪左綠耳小領細頸也又曰絕有力駮馬高八尺曰駮音戎又曰膝皆白惟鼻四骹皆白駮四蹄皆白

首前足皆白驥後足皆白駒前右足白啓左白蹄後右
足白驤左白鼻駢馬白腹驪驪馬白跨驕白州驪尾本
白驤尾白驤駒額白顛白達素縣面額皆白惟駝骹膝
下也蹠蹄也駢赤色驪黑色跨髀間也州竅也尾本尾
根也尾根白曰驤尾毛白曰驤顛額上也素鼻莖也額
額也駢驤駒蹄蹠驪驪驤駒音鼓繪奚劬欺利聿
燕晏卽的又曰回毛在膺宜乘在肘後減陽在幹弗方
在背闕廣減廣音淡光回毛旋毛也膺胸也幹脅也又

曰逆毛居駮音充郭云馬毛逆刺又曰駮牝驪牡鄭氏
謂七尺曰駮牝者色驪牡者色元注周禮復謂七尺已
上者爲駮又曰元駒裏駮裏奴了反鄭云元駒小馬之
別名又曰牡曰騊牝曰騊郭云江東呼駮馬曰騊騊音
舍草馬也又曰駮白駮黃白騊駮馬黃脊騊驪馬黃脊
騊青驪駮青驪騊騊青驪繁鬣騊驪白雜毛鵠黃白雜
毛駮陰白雜毛駮蒼白雜毛騊彤白雜毛駮白馬黑鬣
駮白馬黑脣駮黑喙駮一目白駮二目白魚孫炎云駮

赤色也青驪駟郭云今之鐵驄也青驪驎驪謂青黑二
色相雜如魚鱗郭氏謂今之連錢驄是也鵠郭云今之
烏驄駟郭云今之桃花馬陰淺黑色也駟郭氏謂今之
泥驄蒼淺青色也彤赤色也喙口也凡此所言皆典籍
所載之馬人或不曉其毛物故爾雅釋之驄音虔習
駟呼縣反驎良刃反驪駟駟駟駟駟音陀柔保皮遐
詮閑

牛之屬多爾雅曰庠牛爆牛擺牛犂牛犢牛犢牛犢牛

摩音麻郭云出巴中重千觔爆音電郭云即犂牛也領
上肉爆肤起高二尺許如橐駝肉鞍一邊健者日行三
百里交州合浦徐聞縣出此牛按犂牛漢順帝時疎勒
王來獻此擺音皮郭云擺牛庫小今之犂牛也又呼果
下牛出廣州高涼郡犂音危郭云即犂牛也如牛而大
肉數千觔出蜀中獵音獵郭云即旄牛也髀膝尾皆有
長毛按此牛角向前毛如白雪其長毛今人以爲拂子
出荆夔間犗音童無角牛犂古覓反未詳何牛也又曰

角一俯一仰觭皆踊觭黑脣擗黑背抽黑耳擗黑腹牧
黑脚捲其子犢體長柿絕有力欣掇觭音欺踊騰也謂
角騰起觭音誓擗閏旬反皆才細反目圈也擗音尉捲
音權體身也柿匹外反掇音加

羊之屬多爾雅曰羊牡羴牝牂吳羊牝曰羴音墳又曰
夏羊牡羴牝羴郭云夏羊者黑羴羴也臣疑今胡羊也
多出夏州羴音俞然今人呼牡羊爲股音古又曰角不
齊觭音鬼又曰角三觭羴音險此謂羊角捲三匝者又

曰緡羊黃腹音煩又曰未成羊犴直呂反郭云俗呼五月羔爲犴又曰絕有力奮

狗之屬多爾雅曰犬生三獾二師一獫狁獫音宗祈又成毫狗郭云狗子未生幹毛者又曰長喙獫短喙獨獫駟駢云載獫獨獫獫音呼獫切獨音呼謁切獫音呼驕切又曰絕有力狔音兆尤狗也

通志卷七十六



總校官庶吉士臣侍朝

校對官庶吉士臣陳文樞

謄錄監生臣孟錫山

欽定四庫全書薈要

史部

通志卷七十七上



詳校官員外郎臣楊世綸

欽定四庫全書薈要卷八千九百七十六

史部

通志卷七十七上

宋右迪功郎鄭樵漁仲撰

同姓世家第一上

吳魯燕管蔡曹衛

吳

吳太伯太伯弟仲雍皆周太王之子而王季歷之兄也
季歷賢而有聖子昌太王欲立季歷以及昌於是太伯

仲雍二人乃奔荆蠻文身斷髮示不可用以避季歷季

歷果立是為王季而昌為文王太伯之奔荆蠻自號勾

吳所居地名荆蠻義之從而歸者千餘家立為吳太伯太伯

卒無子弟仲雍立是為吳仲雍仲雍卒子季簡立季簡

卒子叔達立叔達卒子周章立是時武王克殷求太伯

仲雍之後得周章周章已君吳因而封之乃封周章弟

虞仲於周之北故夏虛是為虞仲列為諸侯周章卒子

熊遂立熊遂卒子柯相立柯相卒子彊鳩夷立彊鳩夷

卒子餘橋疑吾立餘橋疑吾卒子柯盧立柯盧卒子周
繇立周繇卒子屈羽立屈羽卒子夷吾立夷吾卒子禽
處立禽處卒子轉立轉卒子頗高立頗高卒子句畢立
是時晉獻公滅周北虞公以開晉伐虢也句畢卒子去
齊立去齊卒子壽夢立壽夢立而吳始益大稱王自太
伯作吳五世而武王克殷封其後為二其一虞在中國
其一吳在夷蠻十二世而晉滅中國之虞中國之虞滅
二世而夷蠻之吳興大凡從太伯至壽夢十九世王壽

夢二年楚之亡大夫申公巫臣怨楚將子反而奔晉自
晉使吳教吳用兵乘車令其子為吳行人吳於是始通
於中國遂伐楚十六年楚共王伐吳至衡山二十五年
王壽夢卒壽夢有子四人長曰諸樊次曰餘祭次曰餘
昧次曰季札季札賢而壽夢欲立之季札讓不可乃立
諸樊攝行事當國王諸樊元年已除喪讓位季札季札
固執不許吳人必欲立季札季札棄其室而耕國人舍
之是歲秋吳伐楚楚敗我師四年晉平公立十三年王

諸樊卒有命授弟餘祭欲傳以次必致國於季札而止
以稱先王壽夢之意季札封於延陵故號曰延陵季子
王餘祭三年齊相慶封有罪自齊來奔吳吳子慶封朱
方之縣以為奉邑以女妻之富於在齊四年吳使季札
聘於魯請觀周樂季札審音知道觀舞知意使歌風自
二南至于陳各知其俗使歌小雅知東遷之衰使歌大
雅知文王之盛使歌頌知周殷魯盛德之所以同也見
舞象與大武知西伯之猶有憾不如武王之極美也見

舜韶濩與大夏知成湯慙於始伐不如禹之勤於其身也見舜招箭則曰舜之德至矣大矣無以加矣去魯適齊知齊將有難謂晏平仲宜納邑與政去齊適鄭見子產如舊交去鄭適衛見蘧伯玉史魚等稱衛多君子去衛適晉及戚聞孫文子鐘聲譏其不宜為樂至晉見趙文子韓宣子魏獻子悅之知三卿必柄晉國將去謂叔向曰晉政將有所歸吾子直必思自免於難語具季札傳中七年楚公子圍弑其王夾敖而代立是為靈王十

年楚靈王會諸侯伐吳之朱方吳亦攻楚取三邑而去
十一年楚伐吳至雩婁十二年楚復來伐次於乾谿楚
師敗走十七年王餘祭卒弟餘昧立王餘昧二年楚公
子棄疾弑其君靈王代立焉四年王餘昧卒欲授弟季
札季札讓逃去於是吳人乃立王餘昧之子僚為王王
僚二年公子光伐楚敗而亡王舟光懼襲楚復得王舟
而還五年楚之亡臣伍子胥來奔公子光客之公子光
者王諸樊之子也常以為吾父兄弟四人當傳至季子

季子即不受國光父先立即不傳季子光當立陰納賢

士欲以襲王僚八年吳使公子光伐楚敗楚師迎楚故

太子建母於居巢以歸因北伐敗陳蔡之師九年公子

光伐楚拔居巢鍾離初楚邊邑卑梁氏之處女與吳邊

邑之女爭桑二女家怒相滅兩國邊邑長聞之怒因而

相攻滅吳之邊邑吳王怒故遂伐楚取兩都而去伍子

胥之初奔吳說吳王僚以伐楚之利公子光曰胥之父

兄為僂於楚欲自報其仇耳未見其利於是伍員知光

有他志乃求勇士專諸見之光喜乃客伍子胥子胥退而耕於野以待專諸之事十二年冬楚平王卒十三年春吳欲因楚喪而伐之使公子蓋餘燭庸以兵圍楚之六澗使季札於晉以觀諸侯之變楚發兵絕吳兵後吳兵不得還於是公子光曰此時不可失也告專諸曰不索何獲我真王嗣當立吾欲求之季子雖至不吾廢也專諸許之光因伏甲士窟室謁王僚飲使專諸置匕首於炙魚之中以進食遂刺殺王僚王僚死公子光竟代

立為王是為吳王闔廬闔廬乃以專諸子為卿季子至
自晉曰苟先君無廢祀人民無廢主社稷有奉乃吾君
也吾敢誰怨乎復命哭僚墓復位而待公子燭庸蓋餘
二人將兵遇圍於楚者聞公子光弑王僚自立乃以其
兵降楚楚封之於舒王闔廬元年舉伍子胥為行人而
與謀國事楚誅伯州犁其孫伯嚭亡奔吳吳以為大夫
三年吳王闔廬與子胥伯嚭將兵伐楚拔舒殺吳之二
公子闔廬謀欲入郢將軍孫武以為未可乃止四年伐

楚取六與潛五年伐越敗之六年楚使子常囊瓦伐吳
迎而擊之大敗其軍於豫章取楚之居巢而還九年王
闔廬用子胥孫武之謀與唐人蔡人西伐楚至於漢水
楚亦發兵拒吳夾水陳吳王闔廬弟夫槩欲戰闔廬弗
許夫槩曰王已屬臣兵兵以利為上尚何待焉遂以其
部五千人襲冒楚楚兵大敗走於是吳王遂縱兵追之
比至郢五戰楚五敗楚昭王亡出郢奔鄖鄖公弟欲弑
昭王昭王與鄖公奔隨而吳兵遂入郢子胥伯嚭鞭平

王之尸以報父讐十年春越聞吳王之在郢國空乃伐
吳吳使別兵擊越楚告急秦秦遣兵救楚擊吳吳師敗
闔廬弟夫槩見秦越交敗吳吳王留楚不去夫槩亡歸
吳自立為吳王闔廬聞之乃引兵歸攻夫槩夫槩敗奔
楚楚昭王乃得以九月復入郢而封夫槩於堂谿為堂
谿氏十一年吳王使太子夫差伐楚取番楚恐而去郢
徙都十五年孔子相魯十九年夏吳伐越越王句踐迎
擊之槩音醉李越使死士挑戰三行造吳師呼自剄吳師

觀之越因伐吳敗之姑蘇傷吳王闔廬指軍却七里吳

王病傷而死闔廬使立太子夫差謂曰爾而忘句踐殺

汝父乎對曰不敢三年乃報越

闔廬冢在吳縣昌門外名曰虎丘下池廣六十

步水深丈五尺銅棺三重瀕池六尺玉鳧之流扁諸之劍三千方員之口二千槃郢魚腸之劍在焉卒十萬餘

人治冢取土臨湖葬三日白虎居其上故號曰虎丘

王夫差元年以大夫伯嚭為

太宰習戰射常以報越為志二年吳悉精兵以伐越敗

之夫椒報姑蘇也越王句踐乃以甲兵五千人棲於會

稽使大夫種因吳太宰嚭而行成請委國為臣妾吳王

將許之伍子胥諫曰昔有過氏殺斟灌以伐斟尋滅夏
后帝相帝相之妃后緡方娠逃於有仍而生少康少康
為有仍牧正有過又欲殺之少康奔有虞有虞思夏德
於是妻以二女而邑之於綸有田一成有衆一旅後遂
收夏衆撫其官職使人誘之遂滅有過氏復禹之績祀
夏配天不失舊物今吳不如有過之彊而句踐大於少
康今不因此而滅之又將寬之不亦難乎且句踐為人
能辛苦今不滅後必悔之王不聽聽太宰嚭卒許越平

與盟而罷兵去七年吳王夫差聞齊景公死而大臣爭寵新君弱乃興師北伐齊子胥諫曰句踐食不重味衣不重采弔死問疾且欲有所用其衆此人弗死必為吳患今越在腹心疾而王不先而務齊不亦謬乎弗聽遂北伐齊敗齊于艾陵至繒召魯哀公而徵百牢季康子使子貢以周禮說太宰嚭乃得止因留略地於齊魯之南九年為騶伐魯至與魯盟乃去十年因伐齊而歸十一年復伐齊越王句踐率其衆以朝吳厚獻遺之吳王

喜惟子胥懼曰是豢吳也諫曰越在腹心今得志於齊猶石田無所用且盤庚之誥有顛越勿遺商之以興吳王不聽使子胥於齊子胥屬其子於齊鮑氏還報吳王吳王聞之大怒賜子胥屬鏹之劍以死是歲也齊鮑氏弑齊悼公吳王聞之哭於軍門外三日乃從海上攻齊齊人敗吳吳王乃引兵歸十三年吳召魯衛之君會於橐臯十四年春吳王北會諸侯於黃池欲霸中國以全周室六月戊子越王句踐伐吳乙酉越五千人與吳戰

丙戌虜吳太子友丁亥入吳吳人告敗於王夫差夫差
惡其聞也或泄其語吳王怒斬七人於幕下七月辛丑
吳王與晉定公爭長吳王曰於周室我為長晉定公曰
於姬姓我為伯趙鞅怒將伐吳乃長晉定公吳王已盟
與晉別欲伐宋太宰嚭曰可勝而不能居也乃引兵歸
國國亡太子內空王居外久士皆罷散於是乃使厚幣
以與越平十五年齊田常弑簡公十八年越益彊越王
句踐率兵使伐敗吳於笠澤楚滅陳二十年越王句踐

復伐吳二十一年遂圍吳二十三年十一月丁卯越敗
吳越王句踐欲遷吳王夫差於甬東予百家居之吳王
曰孤老矣不能事君王也吾悔不用子胥之言自令陷
此乃自剄死蔽其面曰吾無以見子胥也越王滅吳誅
太宰嚭以為不忠而歸

魯

周公旦者周武王弟也

周地為其采邑故謂周公

自文王在時旦仁

孝加於羣子及武王即位旦輔翼用事居多武王九年

東伐至盟津周公輔行十一年伐紂至牧野周公佐武王作牧誓破殷入商宮已殺紂周公把大鉞召公把小鉞以夾武王釁社告紂之罪于天及殷民釋箕子之囚封紂子武庚祿父使管叔蔡叔傅之以續殷祀徧封功臣同姓戚者封周公旦於少昊之虛曲阜是為魯公周公不就封留佐武王武王克殷二年天下未集武王有疾不豫羣臣懼太公召公乃繆卜周公曰未可以戚我先王乃自以為質設三壇周公北面立戴璧秉珪告于

太王王季文王史策祝曰惟爾元孫王發勤勞阻疾若爾三王是有負子之責於天以旦代王發之身旦巧能多材多藝能事鬼神乃王發不如旦多材多藝不能事鬼神乃命於帝庭敷佑四方用能定汝子孫于下地四方之民罔不敬畏無墜天之降葆命我先王亦永有所依歸今我其即命於元龜爾之許我我其以璧與珪歸以俟爾命爾不許我我乃屏璧與珪周公已令史策告太王王季文王欲代武王發於是乃即三王而卜卜人

皆曰吉發書視之信吉周公喜開籒乃見書遇吉周公
入賀武王曰王其無害旦新受命三王惟長終是圖茲
道能念予一人周公藏其策金縢匱中誠守者勿敢言
明日武王有瘳其後武王既崩成王少在襁褓之中周
公恐天下聞武王崩而畔周公乃踐阼代成王攝行政
當國管叔及其羣弟流言於國曰周公將不利於成王
周公乃告太公望召公奭曰我之所以弗辟而攝行政
者恐天下畔周無以告我先王太王王季文王三王之

憂勞天下久矣於今而後成武王蚤終成王少將以成
周我所以為之若此於是卒相成王而使其子伯禽代
就封於魯周公戒伯禽曰我文王之子武王之弟成王
之叔父我於天下亦不賤矣然我一沐三捉髮一飯三
吐哺起以待士猶恐失天下之賢人子之魯慎無以國
驕人管蔡武庚等果率淮夷而反周公乃奉成王命興
師東伐而作大誥遂誅管叔殺武庚放蔡叔收殷餘民
以封康叔於衛封微子於宋以奉殷祀輯寧淮夷東

土二年而畢定諸侯咸服宗周天降祉福康叔得禾異
畝同穎獻之成王成王命唐叔以餽周公於東土作餽
禾周公既受命禾嘉天子命作嘉禾東土以集周公歸
報成王乃為詩貽王命之曰鴟鴞王亦未敢訓周公成
王七年二月乙未王朝步自周至豐使太保召公先之
維相土其三月周公往營成周維邑卜居焉曰吉遂國
之成王長能聽政於是周公乃還政於成王成王臨朝
周公之代成王治南面倍依以朝諸侯及七年後還政

成王北面就臣位，躬躬如畏然。初，成王少時，病。周公乃自揃其蚤沈之河，以祝於神，曰：「王少，未有識，姦神命者，乃旦也。」亦藏其策於府。成王病有瘳，及成王用事，人或譖周公，周公奔楚。成王發府，見周公禱書，乃泣反。周公、周公歸，恐成王壯治有所淫佚，乃作多士、作毋逸。毋逸稱曰：「為人父母者，為業至長久，子驕奢忘之以亡其家，為人子者，可不慎乎？故昔在殷王中宗，嚴恭敬畏天命，自度治民，震懼不敢荒寧，故中宗饗國七十五年。其在高宗，

久勞于外為與小人作其即位乃有諒闇三年不言言
乃驩不敢荒寧密靖殷國至于小大無怨故高宗饗國
五十一年其在祖甲不義惟王久為小人于外知小人
之依能保施小民不侮鰥寡故祖甲饗國三十三年多
士稱曰自成湯至于帝乙無不率祀明德帝無不配天
者在今後嗣王紂誕淫厥佚不顧天及民之從也其民
皆可誅至于文王日中昃不暇食故饗國五十年作此
以誠成王成王在豐天下已安周之官政未次序於是

周公作周官官別其宜作立政以便百姓百姓說之周公在豐病將沒曰必葬我成周以明吾不敢離成王周公既卒成王亦讓葬周公於畢從文王以明予小子不敢臣周公也周公既卒後秋未穫暴風雷雨未盡偃大木盡拔周國大恐成王與大夫朝服以開金縢之書王乃得周公所自以為功代武王之說二公及王乃問史百執事史百執事曰信有昔周公命我勿敢言成王執書以泣曰自今後其無繆卜乎昔周公勤勞王家惟予

沖人弗及知今天動威以彰周公之德惟朕小子其迎
我國家禮亦宜之王出郊天乃雨反風禾盡起二公命
邦人凡大木所偃盡起而築之歲則大熟於是成王乃
命魯得郊祭文王魯有天子禮樂者以褒周公之德也
周公卒子伯禽固已前受封是為魯公伯禽之初受封
之魯三年而後報政周公周公曰何遲也伯禽曰變其
俗革其禮喪三年然後除之故遲太公亦封於齊五月
而報政周公周公曰何疾也太公曰吾簡其君臣禮從

其俗為也及後聞伯禽報政遲乃歎曰嗚呼魯後世其
北面事齊矣夫政不簡不易民不有近平易近民民必
歸之伯禽即位之後有管蔡等反也淮夷徐戎亦並興
反於是伯禽率師伐之於盱作盱誓曰陳爾甲冑無敢
不善無敢傷牯馬牛其風臣妾逋逃勿敢越逐復之無
敢寇攘踰牆垣魯人三郊三遂峙爾芻茭糗糧楨榦無
敢不逮我甲戌築而征徐戎無敢不及有大刑作此盱
誓遂平徐戎定魯魯公伯禽卒子考公首立考公四年

卒弟熙立是為煬公煬公築茅闕門六年卒子幽公宰
立幽公十四年幽公弟潰殺幽公而自立是為魏公魏
公五十年卒子厲公擢立厲公三十七年卒魯人立其
弟具是為獻公獻公三十二年卒子真公湏立真公十
四年周厲王無道出奔彘共和行政二十九年周宣王
即位三十年真公卒弟敖立是為武公武公九年春武
公與長子括少子戲西朝周宣王宣王愛戲欲立戲為
魯太子周之樊仲山甫諫宣王曰廢長立少不順不順

必犯王命犯王命必誅之故出令不可不順也令之不
行政之不立行而不順民將棄上夫下事上少事長所
以為順今天子建諸侯立其少是教民逆也若魯從之
諸侯效之王命將有所壅若弗從而誅之是自誅王命
也誅之亦失不誅亦失王其圖之宣王弗聽卒立戲為
魯太子夏武公歸而卒戲立是為懿公懿公九年懿公
兄括之子伯御與魯人攻弑懿公而立伯御為君伯御
即位十一年周宣王伐魯殺其君伯御而問魯公子能

道順諸侯者以為魯侯樊穆仲曰魯懿公弟稱肅恭明
神敬事耆老賦事行刑必問於遺訓而資於故實不干
所問不犯所知宣王曰然能訓治其民矣乃立稱於夷
宮是為孝公自是諸侯多畔孝公二十五年諸侯畔周
犬戎殺幽王秦始列為諸侯二十七年孝公卒子弗湟
立是為惠公惠公三十年晉人弑其君昭侯四十五年
晉人又弑其君孝侯四十六年惠公卒長庶子息攝當
國行君事是為隱公初惠公適夫人無子賤妾聲子生

息息長為娶於宋宋女至而好惠公奪而自妻之生子
允登宋女為夫人以允為太子及惠公卒為允少故魯
人共令息攝政不言即位隱公八年與鄭易枋及許田
君子譏之十一年冬公子揮諂謂隱公曰百姓便君君
其遂立吾請為君殺子允君以我為相隱公曰有先君
命吾為允少故攝代今允長矣吾方營菟裘之地而老
焉以授子允政揮懼子允聞而反誅之乃反譖隱公於
子允曰隱公欲遂立去子子其圖之請為子殺隱公子

允許諾十一月隱公祭鍾巫齊于社園館于寯氏揮使人弑隱公于寯氏而立子允為君是為桓公桓公元年鄭以璧易天子之許田二年以宋之賂鼎入于太廟君子譏之三年使揮迎婦于齊為夫人六年夫人生子與桓公同日故名曰同同長為太子十六年會于曹伐鄭入厲公十八年春公將有行遂與夫人如齊齊襄公通桓公夫人公怒夫人夫人以告齊侯夏四月丙子齊襄公饗公公醉使公子彭生抱魯桓公因命彭生摺其脅

公死於車魯人告于齊曰寡君畏君之威不敢寧居來
修好禮禮成而不反無所歸咎請得彭生以除醜於諸
侯齊人殺彭生以說魯立太子同是為莊公莊公母夫
人因留齊不敢歸魯莊公五年冬伐衛內衛惠公八年
齊公子糾與召忽管仲來奔九年魯欲內子糾於齊後
桓公桓公發兵擊魯魯急殺子糾召忽死之齊請魯生
致管仲魯人施伯曰齊欲得管仲非殺之也將用之用
之則為魯患不如殺以其屍與之莊公不聽遂囚管仲

與齊齊人相管仲十三年魯莊公與曹沫會齊桓公於
柯曹沫劫齊桓公求魯侵地已盟而釋桓公欲背約管
仲諫卒歸魯侵地十五年齊桓公始霸二十三年莊公
如齊觀社三十一年初莊公築臺臨黨氏見孟女說而
愛之許立為夫人割臂以盟孟女生子斑斑長說梁氏
女往觀圉人犖自牆外與梁氏女戲斑怒鞭犖莊公聞
之曰犖有力焉遂殺之是未可鞭而置也斑未得殺會
莊公有疾莊公有三弟長曰慶父次曰叔牙次曰季友

莊公取齊女為夫人曰哀姜哀姜無子哀姜娣曰叔姜生子開莊公無適嗣愛斑欲立之莊公病而問嗣於弟叔牙叔牙曰一繼一及魯之常也慶父在君何憂莊公病叔牙之言恐斑不得立以告季友季友請以死立斑遂以莊公命召叔牙鴆殺之語在季友傳中八月癸亥莊公卒季友竟立子斑為君斑侍莊公喪舍于黨氏先時慶父與哀姜私通欲立哀姜娣子開及莊公卒而季友立斑十月己未慶父使圉人犇殺子斑於黨氏季友

奔陳慶父竟立莊公子開是為湣公湣公二年慶父與
哀姜通益甚哀姜與慶父謀殺湣公而立慶父慶父使
卜齋襲殺湣公於武闈季友聞之自陳與湣公弟申如
邾請魯求納之魯人欲誅慶父慶父恐奔莒於是季友
奉子申入立之是為釐公哀姜恐奔邾季友以賂如莒
求慶父慶父歸使人殺慶父慶父請奔弗聽乃使大夫
奚斯行哭而往慶父聞奚斯聲乃自殺齊桓公聞哀姜
與慶父亂以危魯乃召之邾而殺之以其屍歸戮之魯

魯釐公請而葬之叔牙之後為叔氏慶父之後為孟氏而季友為季氏謂之三桓焉釐公元年以汶陽鄆封季友季友為相九年晉里克殺其君奚齊卓子齊桓公率釐公討晉亂至高梁而還立晉惠公十七年齊桓公卒二十四年晉文公即位三十三年釐公卒子興立是為文公文公元年楚太子商臣弑其父成王代立三年文公朝晉襄公十一年十月甲午魯敗翟于鹹獲長翟喬如富父終甥舂其喉以戈殺之埋其首於子駒之門以

命宣伯初宋武公之世鄭瞞伐宋司徒皇父帥師禦之
以敗翟于長丘獲長翟緣斯晉之滅潞獲喬如弟焚如
齊惠公二年鄭瞞伐齊齊王子城父獲其弟榮如埋其
首於北門衛人獲其季弟簡如鄭瞞由是遂亡十五年
季文子使於晉十八年二月文公卒文公有二妃長妃
齊女哀姜生子惡及視次妃敬嬴嬖愛生子倭倭私事
襄仲襄仲欲立之叔仲曰不可襄仲請齊惠公惠公新
立欲親魯許之冬十月襄仲殺子惡及視而立倭是為

宣公哀姜歸齊哭而過市曰天乎襄仲為不道殺適立庶市人皆哭魯人謂之哀姜魯由此公室卑三桓彊宣公佞十二年楚莊王彊圍鄭鄭伯降復國之十八年宣公卒子黑肱立是為成公季文子曰使我殺適立庶失大援者襄仲襄仲立宣公公孫歸父有寵宣公欲去三桓與晉謀伐三桓會宣公卒季文子怨之歸父奔齊成公二年春齊伐取我隆夏公與晉卻克敗齊頃公於鞌齊復歸我侵地四年成公如晉晉景公不敬魯魯欲背

晉合於楚或諫乃止十年成公如晉晉景公卒因留成
公送葬魯諱之十五年始與吳王壽夢會鍾離十六年
宣伯告晉欲誅季文子文子有義晉人弗許十八年成
公卒子午立是為襄公是時襄公三歲也襄公元年晉
悼公立往年冬晉欒書弑其君厲公四年襄公朝晉五
年季文子卒家無衣帛之妾廐無食粟之馬府無金玉
以相三君君子曰季文子廉忠矣九年與晉伐鄭晉悼
公冠襄公於衛季武子從相行禮十一年三桓氏分為

三軍十二年朝晉十六年晉平公即位二十一年朝晉
平公二十二年孔丘生二十五年齊崔杼弑其君莊公
立其弟景公二十九年吳延陵季子使魯問周樂盡知
其意魯人敬焉三十一年六月襄公卒其九月太子卒
魯人立齊歸之子裒為君是為昭公昭公年十九猶有
童心穆叔不欲立曰太子死有母弟可立不即立長年
鈞擇賢義鈞則卜之今裒非適嗣且又居喪意不在戚
而有喜色若果立必為季氏憂季武子弗聽卒立之比

及葬三易衰君子曰是不終也昭公三年朝晉至河晉
平公謝還之魯恥焉七年季武子卒八年楚靈王就章
華臺召昭公昭公往賀賜昭公寶器已而悔復詐取之
十二年朝晉至河晉平公謝還之十三年楚公子棄疾
弑其君靈王代立十五年朝晉晉留之葬晉昭公魯恥
之二十年齊景公與晏子狩竟因入魯問禮二十一年
朝晉至河晉謝還之二十五年春鸛鵒來巢師已曰文
成之世童謠曰鸛鵒來巢公在乾侯鸛鵒入處公在外

野季氏與郈氏鬪雞季氏芥雞羽郈氏金距季平子怒而侵郈氏郈昭伯亦怒平子臧昭伯之弟會偽讒臧氏匿季氏臧昭伯囚季氏人季平子怒囚臧氏老臧郈氏以難告昭公昭公九月戊戌伐季氏遂入平子登臺請曰君以讒不察臣罪誅之請遷沂上弗許請囚於鄆弗許請以五乘亡弗許子家駒曰君其許之政自季氏久矣為徒者衆衆將合謀弗聽郈氏曰必殺之叔孫氏之臣戾謂其衆曰無季氏與有孰利皆曰無季氏是無叔

孫氏戾曰然救季氏遂敗公師孟懿子聞叔孫氏勝亦殺郈昭伯昭伯為公使故孟氏得之三家共伐公公遂奔己亥公至于齊齊景公曰請致千社待君子家曰棄周公之業而臣於齊可乎乃止子家曰齊景公無信不如早之晉弗從叔孫見公還見平子平子頓首初欲迎昭公孟孫季孫後悔乃止二十六年春齊伐魯取鄆而居昭公焉夏齊景公將內公令無受魯賂申豐汝賈許齊臣高齋子將粟五千庾子將言於齊侯曰羣臣不能

事魯君有異焉宋元公為魯如晉求內之道卒叔孫昭子求內其君無病而死不知天棄魯乎抑魯君有罪于鬼神也願君且待景公從之二十八年昭公如晉求入季平子私於晉六卿六卿受季氏賂諫晉君晉君乃止居昭公乾侯二十九年昭公如鄆齊景公使人賜昭公書自謂主君昭公恥之怒而去乾侯三十一年晉欲內昭公召季平子平子因六卿謝罪六卿為言曰晉欲內昭公衆不從晉人止三十二年昭公卒於乾侯魯人共

立昭公弟宋為君是為定公定公立趙簡子問史墨曰
季氏亡乎史墨對曰不亡季友有大功於魯受鄫為上
卿至于文子武子世增其美魯文公卒東門遂殺適立
庶魯君於是失國政政在季氏於今四君矣民不知君
何以得國是以為君慎器與名不可以假人定公五年
季平子卒陽虎私怒囚季桓子與盟乃舍之七年齊伐
我取鄆以為魯陽虎邑以從政八年陽虎欲盡殺三桓
適而更立其所善庶子以代之載季桓子將殺之桓子

詐而得脫三桓共攻陽虎陽虎居陽關九年魯伐陽虎
陽虎奔齊已而奔晉趙氏十年定公與齊景公會於夾
谷孔子行相事齊欲襲魯君孔子以禮歷階誅齊淫樂
齊侯懼乃止歸魯侵地而謝過十二年使仲由毀三桓
城收其甲兵孟氏不肯墮成伐之不克而止季桓子受
齊女樂孔子去十五年定公卒子將立是為哀公哀公
五年齊景公卒六年齊田乞弑其君孺子七年吳王夫
差彊伐齊至繒徵百牢於魯季康子使子貢說吳王及

太宰嚭以禮詘之吳王曰我文身不足責禮乃止八年
吳為鄒伐魯至城下盟而去齊伐我取三邑十年伐齊
南邊十一年齊伐魯季氏用冉有有功思孔子孔子自
衛反魯十四年齊田恒弑其君簡公於徐州孔子請伐
之哀公不聽十五年使子服景伯子貢為介適齊齊歸
我侵地田恒初相欲親諸侯明年孔子卒二十二年越
王句踐滅吳王夫差二十七年春季康子卒夏哀公患
三桓將欲因諸侯以劫之三桓亦患公之作難故君臣

多間公游於陵阪遇孟武伯於衢曰請問余及死乎對
曰不知也公欲以越伐三桓八月哀公如陘氏三桓攻
公公奔于衛去如鄒遂如越國人迎哀公復歸卒于有
山氏子寧立是為悼公悼公之時三桓勝魯如小侯卑
於三桓之家十三年三晉滅智伯分其地而有之三十
七年悼公卒子嘉立是為元公元公二十一年卒子顯
立是為穆公穆公三十三年卒子奮立是為共公共公
二十二年卒子屯立是為康公康公九年卒子匱立是

為景公景公二十九年卒子叔立是為平公是時六國
皆稱王平公十二年秦惠王卒二十二年平公卒子賈
立是為文公文公七年楚懷王死于秦二十三年文公
卒子讐立是為傾公傾公二年秦拔楚之郢楚傾王東
徙于陳十九年楚伐我取徐州二十四年楚考烈王伐
滅魯傾公亡遷於卞邑為家人魯絕祀傾公卒于柯魯
起周公至傾公凡三十四世

燕

召公奭與周同姓姓姬氏周武王之滅紂封召公於北
燕其在成王時召公為三公自陝以西召公主之自陝
以東周公主之成王既幼周公攝政當國踐阼召公疑
之作君奭君奭不說周公周公乃稱湯時有伊尹假于
皇天在大戊時則有若伊陟臣扈假于上帝巫咸治王
家在祖乙時則有若巫賢在武丁時則有若甘般率維
茲有陳保乂有殷於是召公乃說召公之治西方甚得
兆民和召公巡行鄉邑有棠樹決獄政事其下自侯伯

至庶人各得其所無失職者召公卒而民思召公之政
懷棠樹不敢伐歌詠之作甘棠之詩自召公以下至惠
侯惠侯當周厲王奔彘共和之時惠侯卒子釐侯立是
歲周宣王初即位釐侯二十一年鄭桓公初封於鄭三
十六年釐侯卒子頃侯立頃侯二十年周幽王淫亂為
犬戎所弑秦始皇列為諸侯二十四年頃侯卒子哀侯立
哀侯二年卒子鄭侯立鄭侯三十六年卒子繆侯立繆
侯七年而魯隱公元年也十八年卒子宣侯立宣侯十

三年卒子桓侯立桓侯七年卒子莊公立莊公十二年
齊桓公始霸十六年與宋衛共伐周惠王惠王出奔溫
立惠王弟頹為周王十七年鄭執燕仲父而內惠王于
周二十七年山戎來侵我齊桓公救燕遂北伐山戎而
還燕君送桓公出境桓公割燕所至地予燕使燕共貢
天子如成周時職使燕復修召公之法三十三年卒襄
公立襄公二十六年晉文公為踐土之會稱伯三十一
年秦師敗于殽三十七年秦穆公卒四十年襄公卒桓

公立桓公十六年卒宣公立宣公十五年卒昭公立昭公十三年卒武公立是歲晉滅三卻大夫武公十九年卒文公立文公六年卒懿公立懿公元年齊崔杼弑其君莊公四年卒子惠公立惠公元年齊高止來奔六年惠公多寵姬公欲去諸大夫而立寵姬宋大夫共誅姬宋惠公懼奔齊四年齊高偃如晉請共伐燕入其君晉平公許與齊伐燕入惠公惠公至燕而死燕立悼公七年卒共公立共公五年卒平公立晉公室卑六卿始彊

大平公十八年吳王闔廬破楚入郢十九年卒簡公立
簡公十二年卒獻公立晉趙鞅圍范中行於朝歌獻公
十二年齊田恒弑其君簡公十四年孔子卒二十八年
獻公卒孝公立孝公十二年韓趙魏滅智伯分其地三
晉彊十五年孝公卒成公立成公十六年卒湣公立湣
公三十一年卒釐公立是歲三晉列為諸侯釐公三十
年伐齊敗于林營釐公卒桓公立桓公十一年卒文公
立是歲秦獻公卒秦益彊文公十九年齊威王卒二十

八年蘇秦始見說文公文公予車馬金帛以至趙趙肅
侯用之因約六國為從長秦惠王以其女為燕太子婦
二十九年文公卒太子立是為易王易王初立齊宣王
因燕喪伐我取十城蘇秦說齊使復歸燕十城十年燕
君為王蘇秦與燕文公夫人私通懼誅乃說王使齊為
反間欲以亂齊易王立十二年卒子燕噲立燕噲既立
齊人殺蘇秦蘇秦之在燕與其相子之為婚而蘇代與
子之交及蘇秦死而齊王復用蘇代燕噲三年與楚三

晉攻秦不勝而還子之相燕貴重主斷蘇代為齊使於燕燕王問曰齊王何如對曰必不霸燕王曰何也對曰不信其臣蘇代欲以激燕王以尊子之也於是燕王大信子之子之因遺蘇代百金而聽其所使鹿毛壽謂燕王不如以國讓相子之人之謂堯賢者以其讓天下於許由許由不受有讓天下之名而實不失天下今王以國讓於子之子之必不敢受是王與堯同行也燕王因屬國於子之子之大重或曰禹薦益已而以啓人為吏

及老而以啓為不足任乎天下傳之於益已而啓與交黨攻益奪之天下謂禹名傳天下於益已而實令啓自取之今王言屬國於子之而吏無非太子人者是名屬子之而實太子用事也王因收印自三百石吏以上而效之子之子之南面行王事而噲老不聽政顧為臣國事皆決於子之三年國大亂百姓恟恐將軍市被與太子平謀將攻子之諸將謂齊湣王曰因而赴之破燕必矣齊王因令人謂太子平曰寡人聞太子之義將廢私

而立公飭君臣之義明父子之位寡人之國小不足以
為先後雖然則唯太子所以令之太子因要黨聚衆將
軍市被圍公宮攻子之不克將軍市被及百姓反攻太
子平將軍市被死以徇因構難數月死者數萬衆人恫
恐百姓離志孟軻乃謂齊王曰今伐燕此文武之時不
可失也齊王因令章子將五都之兵以因北地之衆以
伐燕士卒不戰城門不閉燕君噲死齊大勝燕子之亡
二年而燕人共立太子平是為昭王昭王於破燕之後

即位卑身厚幣以招賢者謂郭隗曰齊因孤之國亂而
襲破燕孤極知燕小力少不足以報然誠得賢士以共
國以雪先王之恥孤之願也先生視可者得身事之郭
隗曰王必欲致士先從隗始况賢於隗者豈遠千里哉
於是昭王為隗改築宮而師事之樂毅自魏往鄒衍自
齊往劇辛自趙往士爭趨燕燕王弔死問孤與百姓同
甘苦二十八年燕國殷富士卒樂軼輕戰於是遂以樂
毅為上將軍與秦楚三晉合謀以伐齊齊兵敗湣王出

亡於外燕兵獨追北入至臨菑盡取齊寶燒其宮室宗廟齊城之不下者獨唯聊莒即墨其餘皆屬燕六歲昭王三十三年卒子惠王立惠王為太子時與樂毅有隙及即位疑毅使騎劫代將樂毅亡走趙齊田單以即墨擊敗燕軍騎劫死燕兵引歸齊悉復得其故城湣王死于莒乃立其子為襄王惠王七年卒韓魏楚共伐燕燕武成王立武成王七年齊田單伐我拔中陽十三年秦敗趙於長平阬其卒四十餘萬十四年武成王卒子孝

王立孝王元年秦圍邯鄲者解去三年卒子王喜立王
喜之四年秦昭王卒燕王命相栗腹約歡於趙以五百
金為趙王酒還報燕王曰趙王壯者皆死長平其孤未
壯可伐也王召昌國君樂間問之對曰趙四戰之國其
民習兵不可伐王曰吾以五而伐一對曰不可燕王怒
羣臣皆以為可卒起二軍車二千乘栗腹將而攻鄣鄉
秦攻代唯獨大夫將渠謂燕王曰與人通關約交以五
百金飲人之王使者報而反攻之不祥兵無成功燕王

不聽自將偏軍隨之將渠引王綬止之曰王必無自往
往無成功王蹴之以足將渠泣曰臣非以自為為王也
燕軍至宋子趙使廉頗將擊破栗腹於鄣破卿秦樂乘
於代樂間奔趙廉頗逐之五百餘里圍其國燕人請和
趙人不許必令將渠處和燕相將渠以處和趙聽將渠
解燕圍六年秦滅東西周置三川郡七年秦拔趙榆次
三十七城秦置太原郡九年秦王政即位十年趙使廉
頗將攻繁陽拔之趙孝成王卒悼襄王立使樂乘代廉

頗廉頗不聽攻樂乘樂乘走廉頗奔大梁十二年趙使
李牧攻燕拔武遂方城劇辛故居趙與龐煖善已而亡
走燕燕見趙數困于秦而廉頗去令龐煖將也欲因趙
弊攻之問劇辛辛曰龐煖易與耳燕使劇辛將擊趙趙
使龐煖擊之取燕軍二萬殺劇辛秦拔魏二十城置東
郡十九年秦拔趙之鄴九城趙悼襄王卒二十三年太
子丹質於秦亡歸燕二十五年秦虜滅韓王安置潁川
郡二十七年秦虜趙王遷滅趙趙公子嘉自立為代王

燕見秦且滅六國秦兵臨易水禍且至燕太子丹陰養壯士二十人使荆軻獻督亢地圖於秦因襲刺秦王秦王覺殺軻使將軍王翦擊燕二十九年秦攻拔我薊燕王亡徙居遼東斬丹獻秦三十年秦滅魏三十三年秦拔遼東虜燕王喜卒滅燕是歲秦將王賁亦虜代王嘉

管蔡

管叔鮮蔡叔度者周文王子而武王弟也武王同母兄弟十人母曰太姒文王正妃也其長子曰伯邑考次曰

武王發次曰管叔鮮次曰周公旦次曰蔡叔度次曰曹叔振鐸次曰成叔武次曰霍叔處次曰康叔封次曰冉季載冉季載最少同母兄弟十人唯發旦賢左右輔文王故文王舍伯邑考而以發為太子及文王崩而發立是為武王伯邑考既已前卒矣武王已克殷紂平天下封功臣昆弟於是封叔鮮於管管在滎陽封叔度於蔡上二人相紂子武庚祿父治殷遺民封叔旦於魯而相周為周公封叔振鐸於曹封叔武於成封叔處於霍康叔封

冉季載皆少未得封武王既崩成王少周公旦專王室
管叔蔡叔疑周公之為不利於成王乃挾武庚以作亂
周公旦承成王命伐誅武庚殺管叔而放蔡叔遷之與
車十乘徒七十人從而分殷民為二其一封微子啟於
宋以續殷嗣其一封康叔為衛君是為衛康叔封季載
於冉冉季康叔皆有馴行於是周公舉康叔為周司寇
冉季為周司空以佐成王治皆有令名於天下蔡叔度
既遷而死其子曰胡胡乃改行率德馴善周公聞之而

舉胡以為魯卿士魯國治於是周公言於成王復封胡

於蔡

胡徙新蔡

以奉蔡叔之祀是為蔡仲餘五叔皆就國無

為天子吏者蔡仲卒子蔡伯荒立蔡伯荒卒子宮侯立
宮侯卒子厲侯立厲侯卒子武侯立武侯之時周厲王
失國奔虢共和行政諸侯多叛周武侯卒子夷侯立夷
侯十一年周宣王即位二十八年夷侯卒子釐侯所事
立釐侯三十九年周幽王為犬戎所殺周室卑而東遷
秦始得列為諸侯四十八年釐侯卒子共侯興立共侯

二年卒子戴侯立戴侯十年卒子宣侯措父立宣侯二十八年魯隱公初立三十五年宣侯卒子桓侯封人立桓侯三年魯弑其君隱公二十年桓侯卒弟哀侯獻舞立哀侯十一年初哀侯娶陳息侯亦娶陳息夫人將歸過蔡蔡侯不敬息侯怒請楚文王來伐我我求救於蔡蔡必來楚因擊之可以有功楚文王從之虜蔡哀侯以歸哀侯留九歲死於楚凡立二十年卒蔡人立其子盼是為繆侯繆侯以其女弟為齊桓公夫人十八年齊桓

公與蔡女戲船中夫人蕩舟桓公止之不止公怒歸蔡女而不絕也蔡侯怒嫁其弟齊桓公怒伐蔡蔡潰遂虜繆侯南至楚郢陵已而諸侯為蔡謝齊齊侯歸蔡侯二十九年繆侯卒子莊侯甲午立莊侯三年齊桓公卒十四年晉文公敗楚於城濮二十年楚太子商臣弑其父成王代立二十五年秦穆公卒三十三年楚莊王即位三十四年莊侯卒子文侯申立文侯十四年楚莊王伐陳殺夏徵舒十五年楚圍鄭鄭降楚楚復釋之二十年文侯卒

子景侯同立景侯元年楚莊王卒二十九年景侯為太子般娶婦於楚而景侯通焉太子弑景侯而自立是為靈侯靈侯二年楚公子圍弑其君郟敖以自立是為靈王九年陳司徒招弑其君哀公楚使公子棄疾滅陳而有之十二年楚靈王以靈侯弑其父誘蔡靈侯於申伏甲飲之醉而殺之刑其士卒七十人令公子棄疾圍蔡十一月滅蔡使棄疾為蔡公楚滅蔡三歲楚公子棄疾弑其君靈王代立為平王平王乃求蔡景侯少子廬立

之是為平侯是年楚亦復立陳楚平王初立欲親諸侯
故復立陳蔡後平侯九年卒靈侯般之孫東國攻平侯
子而自立是為悼侯悼侯父曰隱太子友者靈侯之太
子平侯立而殺隱太子故平侯卒隱太子之子東國攻
平侯子而代立是為悼侯悼侯三年卒弟昭侯申立昭
侯十年朝楚昭王持美裘二獻其一昭王而自衣其一
楚相子常欲之不與子常讒蔡侯留之楚三年蔡侯知
之乃獻其裘於子常子常受之乃言歸蔡侯蔡侯歸而

之晉請與晉伐楚十三年春與衛靈公會邵陵蔡侯私於周萇弘以求長於衛衛使史鮪言康叔之功德乃長衛夏為晉滅沈楚怒攻蔡蔡昭侯使其子為質於吳以共伐楚冬與吳王闔廬遂破楚入郢蔡怨子常子常恐奔鄭十四年吳去而楚昭王復國十六年楚令尹為其民泣以謀蔡蔡昭侯懼二十六年孔子如蔡楚昭王伐蔡蔡恐告急於吳吳為蔡遠約遷以自近易以相救昭侯私許不與大夫計吳人來救蔡因遷蔡於州來二十

八年昭侯將朝於吳大夫恐其復遷乃令賊利殺昭侯
已而誅賊利以解過而立昭侯子朔是為成侯成侯四
年宋滅曹十年齊田恒弑其君簡公十三年楚滅陳十
九年成侯卒子聲侯立聲侯十五年卒子元侯立元
侯六年卒子侯齊立侯齊立四年楚惠王滅蔡蔡侯齊
亡蔡遂絕祀後陳滅三十三年

伯邑考其後不知所封武王發其後為周管叔鮮作亂
誅死無後周公旦其後為魯蔡叔度其後為蔡曹叔振

鐸其後為曹成叔武其後世無所見霍叔處其後晉獻公時滅霍康叔封其後為衛冉季載其後世無所見周有本紀言魯蔡曹衛有世家言

曹

曹叔振鐸周武王弟也武王已克殷紂封叔振鐸於曹叔振鐸卒子太伯脾立太伯脾卒子仲君平立仲君平卒子宮伯侯立宮伯侯卒子孝伯雲立孝伯雲卒子夷伯喜立夷伯二十三年周厲王奔於彘三十年卒弟幽伯

彊立幽伯九年弟蘇殺幽伯代立是為戴伯戴伯元年
周宣王己立三歲三十年戴伯卒子惠伯咒立惠伯二
十五年周幽王為犬戎所殺因東徙益卑諸侯畔之秦
始列為諸侯三十六年惠伯卒子石甫立其弟武殺之
代立是為繆公繆公三年卒子桓公終生立桓公三十
五年魯隱公立四十五年魯弑其君隱公四十六年宋
華父督弑其君殤公及孔父五十五年桓公卒子莊公
夕姑立莊公二十三年齊桓公始霸三十一年莊公卒

子釐公夷立釐公九年卒子昭公斑立昭公六年齊桓
公敗蔡遂至楚召陵九年昭公卒子共公襄立共公十
六年初晉公子重耳其亡過曹曹君無禮欲觀其駢脅
釐負羈諫不聽私善於重耳二十一年晉文公重耳伐
曹虜共公以歸令軍毋入僖負羈之宗族閭或說文公
曰昔齊桓公會諸侯復異姓今君囚曹君滅同姓何以
令於諸侯晉乃復歸共公二十五年晉文公卒三十五
年共公卒子文公壽立文公二十三年卒子宣公彊立

宣公十七年卒弟成公負芻立成公三年晉厲公伐曹
虜成公以歸已復釋之五年晉欒書中行偃使程滑弑
其君厲公二十三年成公卒子武公勝立武公二十六
年楚公子棄疾弑其君靈王代立二十七年武公卒子
平公頃立平公四年卒子悼公午立是歲宋衛陳鄭皆
火悼公八年宋景公立九年悼公朝於宋宋囚之曹立
其弟野是為聲公悼公死於宋歸葬聲公五年平公弟
通弑聲公代立是為隱公隱公四年聲公弟露弑隱公

代立是為靖公靖公四年卒子伯陽立伯陽三年國人
有夢衆君子立於社宮謀欲亡曹曹叔振鐸止之請待
公孫彊許之旦求之曹無其人夢者戒其子曰我亡爾
聞公孫彊為政必去曹無罹曹禍及伯陽即位好田弋
之事六年曹野人公孫彊亦好田弋獲白鴈而獻之且
言田弋之說因訪政事伯陽大說之使為司城以聽政
夢者之子乃亡去公孫彊言霸說於曹伯十四年曹伯
從之乃背晉干宋宋景公伐之晉人不救十五年宋滅

曹執伯陽及公孫彊以歸而殺之曹遂絕其祀

衛

衛康叔名封周武王同母少弟也其次尚有冉季冉季最少武王已克殷紂復以餘民封紂子武庚祿父比諸侯以奉其先祀勿絕為武庚未集恐其有賊心武王乃令其弟管叔蔡叔傅相武庚祿父以和其民武王既崩成王少周公旦代成王治當國管叔蔡叔疑周公乃與武庚祿父作亂欲攻成周周公以成王命興師伐殷殺

武庚祿父管叔放蔡叔以武庚殷餘民封康叔為衛君
居河淇間故商墟周公旦懼康叔齒少乃申告康叔曰
必求殷之賢人君子長者問其先殷所以興所以亡而
務愛民告以紂所以亡者以淫於酒酒之失婦人是用
故紂之亂自此始為梓材示君子可法則故謂之康誥
酒誥梓材以命之康叔之國既以此命能和集其民民
乃說成王長用事舉康叔為周司寇賜衛寶祭器以章
有德康叔卒子康伯代立康伯卒子考伯立考伯卒子

嗣伯立嗣伯卒子虔伯立虔伯卒子靖伯立靖伯卒子貞伯立貞伯卒子頃侯立頃侯厚賂周夷王夷王命衛為侯頃侯立十二年卒子釐侯立釐侯十三年周厲王出奔於玁共和行政焉二十八年周宣王立四十二年釐侯卒太子共伯餘立為君共伯之弟和有寵於釐侯多與之賂和以其賂賂士以襲攻共伯於墓上共伯入釐侯羨自殺衛人因葬之釐侯旁諡曰共伯而立和為衛侯是為武公武公即位能修康叔之政百姓和集四

十二年犬戎殺周幽王武公將兵往佐周平戎有功周平王命武公為公五十五年卒子莊公揚立莊公五年娶齊女為夫人好而無子又娶陳女為夫人生子早死陳女女弟亦幸於莊公生子完完母死莊公令夫人齊女子之立為太子莊公有寵妾生子州吁長而好兵莊公使將石碣諫莊公曰庶子好兵使將亂自此起不聽二十三年莊公卒太子完立是為桓公桓公三年州吁驕奢桓公絀之州吁出奔十三年鄭伯弟段攻其兄不

勝亡而州吁求與之友十六年州吁收聚衛亡人以襲殺桓公州吁自立為衛君為鄭伯弟段欲伐鄭請宋陳蔡與俱三國皆許州吁州吁新立好兵弑桓公衛人皆不愛石碏乃因桓公母家於陳佯為善州吁至鄭郊石碏與陳侯共謀使右宰醜進食因殺州吁於濮而迎桓公弟晉於邢而立之是為宣公宣公七年魯弑其君隱公九年宋督弑其君殤公及孔父十年晉曲沃莊伯弑其君哀侯十八年初宣公愛夫人夷姜夷姜生子伋以

為太子而令右公子傅之右公子為太子娶齊女未入室而宣公見所欲為太子婦者好說而自取之更為太子取他女宣公得齊女生子壽子朔令左公子傅之太子伋母死宣公正夫人與朔共讒惡太子伋宣公自以奪太子妻也心惡太子欲廢之及聞其惡大怒乃使太子伋於齊而令盜遮界上而殺之與太子白旄而告界盜見持白旄者殺之且行子朔之兄壽太子異母弟也知朔之惡太子而君欲殺之謂太子曰界盜見太子白

旄即殺太子太子可毋行太子曰逆父命求生不可遂
行壽見太子不止乃盜其白旄先馳至界界盜見其驗
即殺之壽已死而太子伋又至謂盜曰所當殺乃我也
盜并殺太子伋以報宣公宣公乃以朔為太子十九年
宣公卒太子朔立是為惠公惠公四年左右公子怨惠
公之讒殺前太子伋而代立乃作亂攻惠公立太子伋
之弟黔牟為君惠公奔齊衛君黔牟立八年齊襄公率
諸侯奉王命共伐衛內衛惠公誅左右公子黔牟奔於

周惠公復立惠公立三年出亡亡八年復入與前通年

凡十年矣二十五年惠公怨周容舍黔牟與燕伐周周

惠王奔溫衛燕立惠王弟頹為王二十九年鄭復內惠

王三十一年惠公卒子懿公赤立懿公即位好鶴淫樂

奢侈九年翟伐衛衛懿公欲發兵兵或畔大臣言曰君

好鶴鶴可令擊翟翟於是遂入殺懿公懿公之立也百

姓大臣皆不服自懿公父惠公朔之讒殺太子伋代立

至於懿公常欲敗之卒滅惠公之後而更立黔牟之弟

昭伯頑之子申為君是為戴公戴公申元年卒齊桓公
乃率諸侯伐翟為衛築楚丘立戴公弟燬為君是為文
公文公以亂故奔齊齊人入之文公初立輕賦平罪身
自勞與百姓同苦以收衛民十六年晉公子重耳過無
禮十七年齊桓公卒二十五年文公卒子成公鄭立成
公三年晉欲假道於衛救宋成公不許晉更從南河渡
救宋徵師於衛衛大夫欲許成公不肯大夫元咺攻成
公成公出奔晉文公重耳伐衛分其地予宋討前過無

禮及不救宋患也衛成公遂出奔陳二歲如周求入與
晉文公會晉使人鳩成公成公私於周主鳩令薄得不
死已而周為請晉文公卒入之衛而誅元咺衛君瑕出
奔七年晉文公卒十三年成公朝晉襄公十四年秦穆
公卒二十六年齊邴歃殺其君懿公三十五年成公卒
子穆公遫立穆公二年楚莊王伐陳殺夏徵舒三年楚
莊王圍鄭鄭降復釋之十一年孫良夫救魯伐齊復得
侵地穆公卒子定公臧立定公十二年卒子獻公衎立

獻公十三年公令師曹教宮妾鼓琴妾不善曹答之妾以幸惡曹於公公亦答曹三百十八年獻公戒孫文子甯惠子食皆往日盱不召而去射鴻於囿二子從之公不釋射服與之言二子怒如宿孫文子數侍公飲使師曹歌巧言之卒章師曹又怒公之嘗答三百乃歌之欲以怒孫文子報衛獻公文子語蘧伯玉伯玉曰臣不知也遂攻出獻公獻公奔齊齊置獻公於聚邑孫文子甯惠子共立定公弟秋為君是為殤公殤公秋立封孫文

子林父於宿十二年甯喜與孫文子爭寵相惡殤公使甯喜攻孫林父林父奔晉復求入故衛獻公獻公在齊齊景公聞之與衛獻公如晉求入晉為伐衛誘與盟衛殤公會晉公平公執殤公與甯喜而復入衛獻公獻公亡在外十二年而入獻公後元年誅甯喜三年吳延陵季子使過衛見蘧伯玉史鮒曰衛多君子其國無故過宿孫林父為擊磬曰不樂音太悲使衛亂乃此矣是年獻公卒子襄公惡立襄公六年楚靈王會諸侯襄公

稱病不往九年襄公卒初襄公有賤妾幸之有身夢有
人謂曰我康叔也令若子必有衛名而子曰元妾怪之
問孔成子成子曰康叔者衛祖也及生子男也以告襄
公襄公曰天所置也名之曰元襄公夫人無子於是乃
立元為太子是為靈公靈公五年朝晉昭公六年楚公
子棄疾弑靈王自立為平王十一年火三十八年孔子
來祿之如魯後有隙孔子去後復來三十九年太子蒯
賁與靈公夫人南子有惡欲殺南子蒯賁與其徒戲陽

邀謀朝使殺夫人戲陽後悔不果蒯瞶數目之夫人覺之懼呼曰太子欲殺我靈公怒太子蒯瞶奔宋已而之晉趙氏四十二年春靈公遊於郊令子郢僕郢靈公少子也字子南靈公怨太子出奔謂郢曰我將立若為後郢對曰郢不足以辱社稷君更圖之夏靈公卒夫人命子郢為太子曰此靈公命也郢曰亡人太子蒯瞶之子輒在也不敢當於是衛乃以輒為君是為出公六月乙酉趙簡子欲入蒯瞶乃令陽虎詐命衛十餘人衰經歸

簡子送蒯賁衛人聞之發兵擊蒯賁蒯賁不得入入宿而保衛人亦罷兵出公輒四年齊田乞弑其君孺子八年齊鮑子弑其君悼公孔子自陳入衛九年孔文子問兵於仲尼仲尼不對其後魯迎仲尼仲尼反魯十二年初孔圉文子取太子蒯賁之姊生慚孔氏之豎渾良夫美好孔文子卒良夫通於慚母太子在宿慚母使良夫於太子太子與良夫言曰苟能入我國報子以乘軒免子三死毋所與與之盟許以慚母為妻閏月良夫與太

子入舍孔氏之外圃昏二人蒙衣而乘宦者羅御如孔氏孔氏之老嫗甯問之稱姻妾以告遂入適伯姬氏既食惺母杖戈而先太子與五人介輿玃從之伯姬劫惺於廁彊盟之遂劫以登臺嫗甯將飲酒炙未熟聞亂使告仲由召護駕乘車行爵食炙奉出公輒奔魯仲由入赴孔氏之難為蒯瞶所殺語在子路傳中孔惺竟立太子蒯瞶是為莊公莊公居外怨大夫莫迎立元年即位欲盡誅大臣曰寡人居外久矣子亦嘗聞之乎羣臣欲

作亂乃止二年魯孔丘卒三年莊公上城見戎州曰戎
虜何為是我州病之十月戎州告趙簡子簡子圍衛十
一月莊公出奔衛人立公子斑師為衛君齊伐衛虜斑
師更立公子起為衛君衛君起元年衛石曼專逐其君
起起奔齊衛出公輒自齊復歸立初出公立十二年亡
亡在外四年復入出公後元年賞從亡者立二十一年
卒出公季父黔攻出公子而自立是為悼公悼公五年
卒子敬公弗立敬公十九年卒子昭公糾立是時三晉

彊衛如小侯屬之昭公六年公子亹弑之代立是為懷
公懷公十一年公子頹弑懷公而代立是為慎公慎公
父公子適適父敬公慎公四十二年卒子聲公訓立聲
公十一年卒子成侯速立成公十一年公孫鞅入秦十
四年衛更貶號曰侯二十九年成侯卒子平侯立平侯
八年卒子嗣君立嗣君五年更貶號曰君獨有濮陽四
十二年卒子懷君立懷君三十一年朝魏魏因殺懷君
魏更立嗣君弟是為元君元君為魏壻故魏立之元君

十四年秦拔魏東地初置東郡更徙衛野王縣而并濮陽為東郡二十五年元君卒子君角立君角九年秦并天下立為始皇帝二十一年二世廢君角為庶人衛祀絕



通志卷七十七上



總校官庶吉士臣侍朝

校對官庶吉士臣陳文樞

謄錄監生臣周燾